

金文通公集

匏

匏集

卷十一

碑文

卷十二

墓誌銘

卷十三

墓誌銘

金文通公集卷之十一目錄

吳江金之俊豈凡著

奉

敕撰 明崇禎帝碑文

奉

敕撰南苑 玉皇殿碑文

李文敏公專祠碑文



贈大僕寺卿中明徐公專祠碑文

奉

奉

金文通公集卷之十一

吳江金之俊豈凡著

奉

敕撰 明崇禎帝碑文

臣嘗觀古今治亂之蹟。邦國興替之由。使後之人。得而攷焉。以爲法戒者。其義莫詳於史。大約國之興也。創業開基之君。莫不有應天順人之舉。積功種德。爲



累葉之所憑藉。其亡也。必末季之主。或天資刻薄。殘民以逞。或黯弱昏庸。太阿旁落。或甚而縱欲敗度。滅裂綱常。種種失德。難以枚舉。皆有自取滅亡之道。卽國祚之修短不同。而覆敗相尋。異世一轍。書曰。與治同道。罔不興。與亂同事。罔不亡。非虛語也。我

皇上聰明睿智。典學惟勤。涵泳六經之暇。研精史書。舉前代之是非。往事之成敗。靡不遡原窮委。一一究其指歸。而於明朝興亡本末。更瞭如指掌。於是深晰崇禎帝之所以失天下者。厥咎有在。非末世亡國之君。

可同年而語也。但當時既無實錄。日後慮多傳疑。每厯

睿懷之憫惻。於順治十四年二月內。爰

諭工部立碑表章恭繹

天語。一則曰。明崇禎帝尚爲孜孜求治之主。祇以任用非人。卒致寇亂。身殉社稷。再則曰。若不亟爲闡揚。恐千載之下。竟與失德亡國者。同類並觀。嗚呼。

宸鑑及此。不能不令人低徊歎息。頌我

皇上之明。並日月。發幽光於幾沉。德邁興王。昭公評於



隔代真前此紀載中未有之盛事也。茲工部遵

諭礪石成。

皇上特命臣金之後爲文以勒之碑。臣係故明纍臣。矢

殉溝壑。幸遘

永清之會。再續餘生。旣捧

徽綸而感涕。益驚

專命而徬徨。以謏陋昏耄如臣。何能追闡遺媿。仰副

皇上表章之盛心。然不敢不就見聞所及。謬述其概。以

竊附史官之職也。按崇禎帝本以英敏之資。潛德藩

邸。繼膺大統。當卽位之始。正孽璫煽亂之餘。中外危  
疑。獨能不動聲色。芟夷大憝。如秋風振槁。因目擊人  
心。蠱壞盡屬如醉如夢之流。法紀廢弛。釀成不痛不  
癢之習。銳意更弦。猛圖法祖。恤民隱。畏天災。嘗蔬食  
布衣。痛自貶損。講幄之咨詢不輟。平臺之召對屢勤。  
一段宵旰靡寧。想望太平之意。誠有如

上諭所云孜孜求治者。假令當日有先憂後樂之臣。同  
心一德。匡濟時艱。小康猶可坐致。卽或中材之佐。警  
戒綢繆。尚得彌縫歲月。其如怙媮積玩。貪黷成風。下



吏之精神。專用以鑽營結納。大僚之好尚。唯在乎位。高金多。以致民窮盜起。然發難之初。不過西陲一隅。亦何難以國家全力制之。而上下相蒙。以賊爲諱。嘯聚之勢。日熾月盛。攻城掠邑。有同破竹。然後舉國張皇。紛紛議選將。議抽兵。議加派。議設總理。總督。重臣。臨渴掘井。毫無成算。以言勦則挫衄屢聞。以言撫則招徠無術。至於驕兵悍將。反借賊勢披猖。爲護身符。來不能禦。去不能追。遂蔓延流毒。秦晉楚豫巴蜀。暨大江以北。所在騷然。而朝端之上。方今洛蜀之黨。日

構陰陽之戰。厝火怡堂。獨以賊遺君父憂。間有一二耿介特立之士。以公忠體國爲念。又往往不安於其位。一時內外文武。事權在握者。無一實心辦賊之人矣。致令仁明銳治之主。不幸而丁中葉陵替之後。起弊扶衰。萬難措手。兼之孑然孤立於上。四顧盈庭。茫無可倚。譬如疋羸之夫。病之初中。尚在膚膜腠理之間。中醫猶能按脈而治。及耽延日久。深入膏肓。雖有盧扁。救療安施。豈非天之所廢。莫能興之。而人謀不臧。適任其咎者耶。攷史傳所載。凡末季亡國之君。覆



車之轍。崇禎帝並無一蹈焉。乃身殉宗社。不引天亡之言。亦綦烈矣。嗟乎。傷哉。有君無臣。禍貽邦國。竟若斯哉。此明代往事之可爲痛哭流涕者也。我

皇上深用憫惻。而欲亟爲之闡揚。是卽孔子當年作春秋之心。褒貶出乎至公。瑕瑜毋令相掩。俾天下後世讀明史者。咸知崇禎帝之失天下也。非失德之故。總由人臣謀國不忠所致。庶後之爲人臣者。悚然知所戒。而後之爲人君者。亦知慎於用人也已。然則煌煌睿諭。明乎制治保邦。勿玩小寇。而弭寇必以安民爲本。

安民則又以知人爲本。此匪直昭一時之信史。實著萬世之常經。蓋永爲君若臣之寶鏡云。

奉

敕撰南苑 玉皇殿碑文

原夫權輿萬化。鈞鑄羣類。莫不統職於天。天博施而無垠。必授命於建中。會極之主。敬奉不違。然後覆燾攸鬯。而品物咸熙。故古帝王。奠世永祚。躋億兆於仁壽之域。恒本之欽。崇天道。良有以也。臣謹按道錄所紀

高上玉皇天尊。湛源妙有。棲體清微。邛法上清。垂慈欲界。釋五迷十惡之縛。弭曠潦兵饑之災。為國家弘致嘉



祥匡御運度。神功靡得而究云。而臣竊嘗以儒者之道。衷之天。固無時不以其寒暑晝夜。風雨露雷之令。與王者之慶賞刑威。生殺予奪。相響答于一氣之中。以極其利濟蒸民之大用。三代而下。非無游心至道。疑想穹麻。而仁民之澤。未覃事天之實。弗著。欲冀慈光徧燭。夫塵寰呼吸。類通于紫闕。空或覩矣。洪維我皇上。首出龍飛。神武天關。仗旄麾。御攬捨。立掃牂。荆昆彌之鄉。逡巡稽顙。番禺日出之國。次第來王。乃憫念黎元。夙劊鋒鏑。積迷怙非。觸蹈辟網。將天佑下民。作

君作師之謂何。是以夙夜怒渝。是懼弗遑。寧處既已

南郊肅燿。

二廟陪禮。復就深宮。建壇昭事。凡以崇清修而對越。介純

嘏于

慈闈。而復歆然念

天子之孝。非斤斤飭辭祝史。迓休冥漠。進萬年之觴于寢掖而已。必使驕陽不愆。沴陰無伏。翔洽于時和年豐。而後含飴之七箸。以調。必使札厲泯戾。些窳闕孽。優游於茂對時育。而後難老之眉耆。以豫。必使朝鋤



金文通公集 卷十一 文  
七  
秕政。野薙囂俗。五刑咸措。五兵盡戢。洒濯於風動時。雍之化。而後合甸海之巷。舞塗歌。喙濡跂躍。以介景福於

聖母皇太后者。有如川至而日升。用是積精禪慮。祇謀肅將。維茲南苑。延袤百里。爲

法駕豫遊。羽林蒐閱之區。而

皇心淵謐。出王游衍。罔弛寅畏。相苑之東北隅。有地閒曠。爽塏囂塵弗及。爲上真所樂棲。爰勅鳩庀。規摹輪奐。賜名元靈宮。弘除廣道。分峙巍標。左曰祈天永命。

右曰歛福錫民。山門三楹。中列年月日時四功曹。爲山靈擁鎮之始。署曰宅真寶境。傍建鐘鼓樓各一。進之爲朝元門。四天帥列焉。旣而城平拾級。瓊宮斯啓。曰元極殿。薨棟干霄。欄楯圍覆于焉。奉

高上之聖容。液銅爲質。塗以兼金。霞冠碧珪。皆天府之懸黎。結綠。體妙自然。儼如陟降。又進之爲三門。列四正之神曜。左則青龍朱雀。右則白虎元武。蓋二十八宿躔次之所分麗。明堂咸池太微中星之所營守。爲萬靈之綱紀。署曰元始門。門以內東西各有配殿。真武



九天文昌居左。水府三元居右。各侍以真人。仙宰隅拱大殿。殿曰凝始。爲

三清肅居。諸真朝元之境。稍前則爲四帝。

玉皇座居中左。而紫微勾陳后土。以次並列。又有四真人。暨十方靈寶。環衛而森立焉。殿後繞以道館。凡若干楹。將遴道士有功行居之。是役也。經始于十三年之春。告成于十五年之秋。閱三載。費盈鉅萬。皆出

尚御損抑。及後宮節縮之餘。不徵民間。一役半緡金碧。燦于丹霞。椽題矯于翬革。誠至真之勝域。京轂之麗

觀。猗與偉哉。

駕幸肅瞻。欣豫有加。特詔臣之後暨。同官臣正宗。各擢辭恭紀其事。勒之貞珉。臣自惟學術舛淺。素昧天樞。何能仰窺

黼辰恭默之思。所以妙契

穹蒼。而謬衷以儒生臆說。竊謂天人相與之際。如景應表。如鼓答桴。幾微不爽。每見我

皇上一念祇肅。陰陽效順。方淫霖而靈暉旋覲。甫焦土而弘霈頓盈。以至瓊田表瑞。玉樹占豐。應念感通。毋



頌圭璧。因是知我。

皇上十五年來。慶賞刑威。生殺予奪。與天之寒暑晝夜。風雨露雷。相響答於一氣中者。曾無呼吸之或間也。然則斯宮之建也。豈徒崇繕丹雘。尊奉

昊天于色。相莊嚴之間哉。蓋我

后敬天之誠。與孝思之篤。自端冕臨朝。深宮燕閒。暨夫蒐苗獮狩。振旅飭武之地。無往而不周。且毖焉有非。珥筆老臣。颺言之所能罄者已。謹拜手稽首而系之以頌。頌曰。

夔哉高上。宰化之精。彌羅胚質。湛寂瑩晶。劫超妙有。範總真靈。玉京演籙。弘濟羣生。清靜無朕。功用瀰淪。授命司牧。執契陶鈞。翔和布爽。協符笑顰。感而遂通。合漠惟純。於鑠

皇清秉帝之杓。載旆麾旄。隅圖肆畧。義聲奄馳。仁恩暨礪。亦儉亦慈。玉關金鑰。猶嚴戲豫。肅禋

郊壇。媿配

祖禰。萬國同歡。毖壇大內。昭事彌殫。用介

慈祉。福祿攸蟠。雲漢方嗟。甘霖漑被。天吳厘憂。赤輪御轡。



金文通公集 卷十一 文  
修德弭災。影從響萃。答貺。

高穹夙興。夜寐麟麟。

萬乘蒐自南闡。曠彼死土。嶮離郊塵。上真樂棲。百靈羣  
賓。時值農隙。經始聿新。有司不知。子來維速。峻閣嵯  
峨。崇堦縈複。丹碧棖輝。瓊琳像肅。絲績周施。莊嚴馥  
郁。會緡盈億。闔無溢科。好用是節。樂成騰歌。璇宮霞  
煥。

皇心載那。信薦祝史。釐躬勿多。

昊天眷命。實祐下民。平康極會。雨暘徵循。六俗咸粹。五兵

潛馴。從欲以治。妙契洞真。一遊一豫。

帝亦來格。瑞應祥臻。孝思維則。老臣勒銘。戒諛弗飾。億  
萬斯年。於昭無斁。

李文敏公專祠碑文

夫祀典之崇。非獨表揚先喆。亦所以風勵後世。至鉅  
典也。而崇祀于鄉。爲學者矜式之所自始。其關係名  
教尤切。而徵信于月旦更真。必其人品望超卓。德業  
兼隆。大節細行。毫無間然。俾後人愛慕感悅。歷數十  
年如一日。斯足生俎豆之光。而廟貌亦永永弗替。此  
非聲勢赫奕。所可襲而取也。故有位登台鼎。傾動一  
時。其始也畏壘之宮。非不巋然。而或名與實不相副。  
將喩喩訛訛。無論田夫牧豎。皆得指摘其短。卽身在



裸將之列者。或貌承而心不愜。久且羣情懈弛。掉臂去之。敗瓦頽垣。淪沒於荒烟衰草者多矣。况能令父老子弟。興懷於隔代。相與煥棖桶。潔牲醴。以媿隆大饗。爲愉快者乎。明故大學士李文敏公。捐館在崇禎四年辛未。距

今上龍飛之十一年甲午。閱二十四春秋矣。鄉之縉紳士民。思公未嘗刻置。列狀有司。稱公懿行純備。亮節昭垂。功繫一時社稷之重。而澤貽百年風教之遠。請崇祀澤宮。以昭

國典。慰輿望。維時鉅禮。雖舉喁喁者。尚未厭也。又六載。爲今順治己亥春。復請建專祠祀公。憲議僉孚。新楹聿煥。蠲吉薦羞。猗歟盛哉。縉紳士民。將勒辭麗牲之石。而徵余言。颺其事。余按高陽爲上谷旁邑。受博大爽塏之氣。固宜鴻啓人文。光彰大業。而公以德闕儒宗。接四世南宮之武。甫垂髫。卽天挺逸藻。迥然不羣。登萬曆癸丑進士。絲庶常。授簡討。己未分較禮闈。稱得士。後三歲。游晉宮僚。攝少司成。值天啓初年。猶勤新政。修臨雍之典。公升堂講易。天子動容。橋門環聽。



一時歎稽古之效。復見漢東京盛事。旣而啓沃經筵。引尚書義。規切時務。格非廣益。朝野爭拭目。公參大政。致太平。會璫焰方張。詔獄屢起。負鯁者旣逞螳立。糜舍垢者因結蟬紆禍。撲炎乃益其灼。從風不勝其靡。公燕居深念。謂城社未便灌熏也。故正已而不示以圭稜。闕虓弗可犢牯也。故閑邪而不深其嫉忌。劇牙也弗以抵吻。絡首也弗以決蹠。方璫冒引邊功。合諸營建捕緝。竊崇五等。濫及廝養。要結黨附。恐喝朝紳。駸駸乎勸進九錫矣。公矢心曲防。以身爲砥。所被

詰。廕賚予再四。疏辭婉言。微中令積慮。頌新者不寒而慄。及璫計傾戚。畹以撼中宮。公雪涕危言。子不宜佐父難母。奸謀沮戢。宮闈獲安。時媚璫者。至頌天與人歸。建祠遍海宇。其在輦下者。公未嘗捐貲拜謁。後復規覲辟雍隙地。以公持之。堅而寢。諸所挾喜怒。以矯僭威福。公委蛇曲劑。釐正保全。爲多益以正色。垂紳之度。寓其潛消。默折之權。至於導揚末命。擁戴長君。弭肘腋之危。疑啓風雷於旋轉。公之爲功。藏於不見。不聞真無得而稱焉。其爲功也。更何如哉。迨夫滌



除兇豎。庶政維新。向之徘徊持祿者。或自陳曲突之勞。爲躡升之地。而公獨介然引咎。屢疏乞身。人主援義責留。勉出受命。一時高文大冊。如登極。如冊后。咸取辨公手。所條列十事。皆用人恤民之大。至爲勅幾者。防忽。藉權者。杜微。比於魏文貞之陳規。思漸當日。稱崇禎始政。庶幾貞觀遺風云。蓋正人秉鈞。雖碩果猶食福。而是時四郊多壘。中朝日構水火。民窮餉匱。綢繆罔策。公隨事抒蓋。用弘匡救。人主亦降心倚重。而公旣堅引退。復感人言。連章稱母老身病。情辭剴

摯。始得允歸。其予告隆恩。爲輔臣所罕邁。祖帳傾都門。人皆榮之。公以冲襟雅量。際明夷艱貞之會。念漢季北寺酷禍。成於正人。憤疾輕試。爲不密失身之戒。逮宋元祐熙豐間。君子以徑情獨往。方隅自窒。爲小人所借援。而造以重其構。公是以匪躬兩朝。惟和衷求濟。嚴於律已。弘於恕物。常令吾身立於有餘。以默杜兇人不測之圖。不遽履尾而速之。啞幾沉慮。遠形諸前後章奏內。其辭有云。天下不可以方隅限人才。不可以恩讎私。以天下心。用天下人。以天下人。理天



下事。又云舉世無不可用之人。而不必同於已。天下無不可為之事。而不必有其功。又云恩威出於明主。或藉之以行私。職掌隸在諸司。或干之以行意。異懦博長厚之譽。偏執冒介勁之聲。惟便身圖罔恤國事。皆切中時弊之語。上稱其忠清端亮誠然哉。蓋嘗論公生平大節。有呼吸安危者三。當熹廟大漸。璫猶矯遺旨。竄顧命。公奮議削之。使不得逞。比漢絳侯之立。奪北軍。憑几之際。承諭大聲。傳宣皇弟。以絕非常。同韓魏公之捲簾。審視至身。將去國。首薦蒲州象雲。韓

公謂可當大任。用心等之。鄼武兩侯而疏中。所稱破方隅。忘恩怨。實公居身立朝之第一義。自筮仕以至。蓋棺總無渝。此嗚呼若公者。洵無愧休休之小臣歟。公孝友天性。痛贈公不逮祿養。哀慕終身。其適歸晨昏太夫人。愉愉膝下者三載。所受兩朝叙蔭。分子從弟及從兄之子。祀先而家廟。勗瞻族而義倉。置敦倫好義。殆不遺餘力。角巾杖屨。徜徉洪山白水間。海內仰公如祥麟威鳳。猶望東山再起。而台星告殞。俄乘箕尾。德功高於曠代。而享年不登中壽。天下悼焉。公



金文通公集 卷十一 專祠碑文 三  
本以儒術起家。操一心周旋兩主。履險如夷。出處爭  
光。日月肯堂。敷畝克開。翼子今揆。輔坦園公。發跡

### 與朝懋膺

簡注宅心如。水觸事如鏡。廓然於方隅。恩怨之外。皆續  
公。令緒以引伸。於無窮也。昔濂洛諸儒。崇正闢邪。廟  
食千載。公更益以圓機妙用。不毀其方。而適以濟其  
方。在朝朝重。在鄉鄉重。所稱鄉先生。沒而祭於社者。  
惟公足以當之。詩曰。高山仰止。景行行止。是不可無  
記。以詔後之。聞風興起者。

### 贈太僕寺卿中明徐公專祠碑文

自古忠義節烈之倫。載在簡編。生氣凜凜。猶令千百  
世而下。一憑弔焉。如親見其人。如目擊其事。不禁動  
色。悚容。低徊歎賞。恨不與之生同時。居同里。爲之奮  
筆表彰。而英風烈概。乃徒得之誦讀寤寐間也。况乎  
當吾世而實有其人焉。孤忠之熱血未冷。廟貌之釐  
葺方新。若忠烈徐同卿中明公者。曾與余同戊午鄉  
薦。又同出陽羨。蔣澤壘先生之門。稔悉公生平制行。  
與夫殉難大節。其何忍不詳述而謹識之。以爲扶翊



名教風勵人心之一助乎。按公諱世淳，字中明，號弟之。其先汴人也。始祖崇，自海州徙淮安。三傳爲南唐吏部尚書鉉，再傳爲宋翰林學士通。其子從高宗南渡，徙越。洪武初，諱士金者，贅嘉興之卜氏，遂爲嘉興人。六傳爲雷州府同知諱學周，生南京兵部侍郎贈兵部尚書諱必達，公其冢子也。尚書偉望碩儒，文章事業炳炳烺烺。公善讀父書，自幼器重于時。年十六，補博士弟子。十九，遭母陳淑人喪，以大父命娶戴主喪事。易戚中禮，家邦稱之。父宦遊，公偕戴恭人奉大

父朝夕，甘旨承歡，八載而歿，無異司馬。公日侍左右也。歲戊午，以春秋舉于鄉，累試南宮不第。時司馬公任大京兆，尋轉御史操江。公常從任，平妖賊，悉飭防江。公謀居多。辛未，授建德教諭。未之官，父病革，議分析公盡以產讓諸弟。曰：兒幸以大人庇，可不饑，不敢利分毫。司馬公嘆曰：豕孫不可以無分。公曰：此兒子事，讓于身而逮其子，如無讓焉。司馬公色愉甚，遂允其讓。居喪次，毀瘠骨立。旋入京，臚舉先臣德業。陳請卹贈優答如禮。服闋，補永嘉教諭。首葺學宮，日兢



競焉正文體。飭士風。為諸生夏景僖請終母喪。引孝  
慈錄會典等書。詞旨愷切。學使者許之。多士蒸蒸向  
風焉。方是時。海賊劉香。屢犯內地。公佐兵使者。以方  
畧建關隘。絕勾引。賊勢窘促。甌越以寧。雖落落青  
瑣。哉而胸填武庫。已露一班矣。丙子。中州以分校聘。卻  
之不赴。丁丑。除重慶府推官。時流寇捫歷參井。蹂躪  
夔渝。勢甚披猖。公下車。即嚴保甲。編伍符。葺雉堞。樓  
櫓。櫓裕芻糧器械。旬日寇警至。會備禦已周。寇不能犯。  
時督撫因兵餉旁午。皆攢眉棘手。相顧靡措。公為條

上十餘則。悉劃臆中肯。軍民便之。居官計口食俸。革  
舖行。省廚傳。所至民安。摘發大奸張成。郝應。選一郡  
為之肅清。省釋冤獄凡數十人。大小獄情一經剖折。  
便成鐵案。上官不能為公專也。公署巴縣。督師楊嗣  
昌徵餉萬斛。後期者軍法從事。公括倉穀。僦舟楫。五  
日立辦。民不告病。他郡驚以為神。榮昌令光時亨。有  
清節。為飛語所中。將得罪。公力爭。乃解。黠生龍袞者。  
素持官吏短長。因緣為奸。以事憾其師。迫挾殺人。復  
嫁其父死罪。父飲毒死獄中。袞遂以虛辭擊登聞鼓。



變公覈其倍師殺父諸罪立讞寘法衆皆歡呼一日  
臺檄公協勦資簡諸氛提兵四千餘兼程鼓行糗械  
畢具士勇百倍遂獮馘無算凡公期會徵發往往不  
戒而行不嚴而信民不驚而事集者良由公明足照  
奸勁足抑強清足服人仁足逮物卽管葛不是過也  
已卯以葩經分較得士七人皆巴蜀名彥于是公望  
最李官臺章交薦將晉職省臺會蜀有銓司不快者  
嗾選長移公守隨時隨已殘破劇寇逃兵縱橫滿野  
士民號呼請留公曰王事孔棘非臣子辭難之日也

且以死讓人不仁避難不赴不義不仁不義何以爲  
臣遂就道時督師雅知公才惜公之行欲移調公他  
所公以君命固辭曰成敗利鈍以身當之不敢有二  
所以報明公耳歸訣于司馬之墓曰竭其股肱之力  
繼之以死庶無忘我君父恩也家衆皆哭失聲公慷  
慨戒舟盡發篋中金并括產貲以行召其長子肇森  
囑以家事以次子肇樑從庚辰十月抵隨登城一望  
極目榛蕪白晝青燐倏忽現滅山城僅二里許戶不  
滿三百女堞城垣頽圯將盡廼召父老問狀咸言州



民死賊死兵死賦死疫死潦死旱誰爲公辦歲賦從  
王事者公爲愀然慰諭再三勉以忠義俄報人馬北  
來公卽登陴審視叮語趙袁二弁以城爲家遂躬棲  
城闈與鳥雀爭止日夜討究城守事宜越數日有客  
兵號數萬止關廂索芻糧甚急噪呼震地公單騎詣  
之諭主帥曰隨一困賊再困兵饑饉連年其何以應  
帥怒將有所發公徐日向監軍蜀土督兵數萬今來  
隨早慮官兵爲暴已上書閣部受檄監紀行且得旨  
汝曹勿以隨試也不揖而出帥恐遂引去公念危城

中民所首急在饑爲平糶賑救而民不苦饑民所更  
苦在賦爲之造流亡冊而民不苦賦民所難在守爲  
之濬城濠置器械益隍堞築馬道俾騎可旋足扞擻  
無礙而民不苦于守此公駐防之大略也凡若此者  
爲費不貲者取諸來時所裹篋金不給則又飛檄家  
中質產以從者也自是驚魂甫定隨民稍稍有固志  
乃以餘閒給饑民糜粥廉得士之貧者七十餘人人  
給穀一石多士感德又集鄉保人戶細詢姓名默識  
驍勇得三百餘人朝夕訓練號曰義勇以爲練鄉兵



謝客兵之本。辛巳二月。獻賊以十萬騎破襄而下。號四十萬。公與次君率家丁晝夜登陴。衣不解帶。募城下民丁協守。分義勇二隊。一爲策應。一爲巡守。時有州民沒度虎等欲勾賊內應。公察擒之。又得謀李二等。將發火內應。誅之。賊解去。越數日。有客兵焚劫關廂。公命義勇堵截。擒首難八人。梟示而亂始定。又數日。賊抵隨之西北境。公聞使三走。鄖告急。有巡道某抵其章于地。巡撫發一遊擊率兵援隨。某勒之守鄖。留弗遣。血書四出。聲援不至。四月。信陽陷。賊以百騎

詐稱左鎮兵臨城。公察其僞。守益嚴。旋引去。掠隨之平里市。出兵救之。得全。旣而張曹二賊帥悉力攻城。乃發矢石殺傷甚衆。賊益怒。數日。食盡。削樹皮食之。民無異志。公時不食。二日。不解甲。五日。復申盟。厲衆決志死守。四月二十五日。賊入道。並入北門。報陷。公仰天呼曰。臣力竭矣。與子肇樑鑿地埋印。勒兵巷戰。遇賊斥公下馬。公曰。奉命討賊。何下馬爲。公面中一箭。又一刀。眼鼻橫傷。大聲罵賊。遂碎首墮馬。公左手掣刀。右手猶緊握印箱。銳悅賊怒甚。亂刃交下。而公



殞矣。公子肇樑奔至。被賊截傷二臂。拊尸頓踊且哭。且罵賊知爲州官子。驅至城外殺之。且死呼州人告。埋卹處卹獲全焉。賊入州署。公妾趙氏抱幼女申姑。泣賊挾之行。怒罵不屈。賊怒殺申姑。罵益厲。賊益怒。斷趙人指。罵不絕。遂刃之。推石碎顱而死。次妾王氏亦同日殉。及僕從男婦十有八人。或死于鬪。或死于詈。死各不同。其殉公殉城一也。公死三日。傷民稍集。感公忠義。具棺衾以殮。有吳人石琳求得趙氏屍殮之。與申姑屍相抱不解。胸著布囊。函金剛經三寸許。

遂併棺以殮。獨次君。卒不可得其遇害時向。城拜曰。父死國事。必無反骨。長作山城。厲鬼以報君父。若其也。臺省上其事。贈公太僕寺少卿。與塋祭于隨。子某名立專祠。有司歲時祠。子樑從焉。公真不朽也。已。憶昔予附公雁行後。每見公卓犖不羣。明經術。善談論。與人愉怡。藹若春風。性喜飲好雅謔。獨于忠孝大節。居恒侃侃。若不可斯須去者。長不滿六尺。質弱如不勝衣。乃能亢節秉志。百折不回。以一身臨數萬賊兵。凡歷七十餘晝夜。而氣不衰。



志彌奮卒殉斗絕之孤城赴死如歸嗚呼父死忠子死孝二妾死節僮僕一十八人死義一門烈氣貫日冲霄視張許更過之矣傳言公生時司馬公夢文丞相入謁榜前導署曰明忠公洵天授異人哉廟食千秋師表百世非公其孰能當此余是以奮筆為之記云

當時四郊多壘而獻賊蹂躪三楚江漢汝濱之關無一堅城徐公身殉職守一門全節烈哉爭光天壤也千秋萬世不朽斯文吳興後學夏宁校識

金文通公集卷之十一終

金文通公集卷之十二目錄

吳江金之俊豈凡著

光祿大夫內弘文院大學士岱輿高公墓誌銘

光祿大夫太子太保左都御史望仁徐公墓誌

銘

光祿大夫太子太保工部尚書管都察院左都

御史魯齋霍公墓誌銘



光祿大夫太子太保弘文院大學士蒼忱呂公墓誌銘

金文通公集卷之十二

吳江金之俊豈凡著

光祿大夫內弘文院大學士岱輿高公墓誌銘

順治十有二年乙未春三月。靜海孝廉高君恒懋。持其先人宮保岱輿公狀來乞余銘。以余與公同朝者十載。且後先同官。為中西銓尋。又相繼入政府。習公最久。知公最深。因泣而請曰。孤不忍先君子德行。泯



沒無聞。求誌其生平。而系之銘。以垂不朽者。舍先生誰屬哉。余惻然于中。而誼有弗獲辭也。謹按狀。公諱爾儼。字中孚。號岱輿。別號鉢菴。先世家靜海縣西宗保村。累傳有隱德。不事聞達。王大父一峰公。諱萬億。始筮仕。爲鴻臚。好義任俠。以不畏強禦稱。高氏聲乃振。大父拱吾公。諱如斗。未仕。克紹家聲。父望雲公。諱攀桂。貢士。博學篤行。邑之人號爲古君子。生丈夫子二。長卽公。生而穎異。七歲善屬對。矢口驚人。塾師奇之。曰。吾不能爲若師。遂辭去。十歲能文章。十五應童

子試。郡邑皆冠軍。時督學御史爲桐城左公光斗。有文名。閱公卷。亟稱之。曰。此他年宰相材也。首拔之。如郡邑。十六歲食餼。每試輒前茅。其爲文根本經史。磅礴變化。如江淮河漢之水。滙之有源。發之莫禦。吮毫伸紙。頃刻立就。年二十。登丁卯賢書。公車數上。不利。益扃戶讀書。恒夜漏數十下。方就枕。雞鳴卽起。如是者十有三年。績有高伯子制義。自嬉草古處堂全稿。漸堂初集。一時紙貴洛陽。雖處困約。未嘗一謁有司。當事者表其廬爲真孝廉。庚辰成進士。受知姑蘇徐



公汧先生見而喜曰子殆韓范一流人闔闈時早以文卜之矣廷對擢第三人授翰林院編修晉江蔣公德璟為館師每謂人曰高太史器識宏遠他日功業必有大可觀者因贈以手評資治通鑑經世八編二書辛巳五月丁母夫人曹氏艱訃至哀毀逾節大病幾不起又恐傷望雲公心恒強顏侍側以冀解慰退則淚未嘗乾也是歲畿輔旱蝗人相食公施粥倡賑全活饑民無算癸未秋服闋時更期八月會試例應充同考官公以母服方終因謝分校延至撤闈後始

陛見其恬退類此尋補原官纂修六曹章奏充經筵展書官起居注時寇氛漸逼都門當國者束手靡措上震怒罷井研併及晉江特用通州為首揆公上疏直晉江忠誠體國不宜與井研同罷爭甚力執政啣之公弗為顧甲申之變抱封公痛哭幾絕忍死避跡會

皇清定鼎授官如故乙酉四月擢內翰林秘書院侍讀學士充修史副總裁

詔敕撰文七月陞禮部右侍郎比禍亂初平修文伊始



諸凡辨等威。定民志。端教化。正風俗。公悉心考訂。酌古準今。務得大體。丙戌二月。充知貢舉官。爾時道路多梗。四方公車。弗能如期達。特請展期十日。以網羅後至。丁亥。再行會試。有失文引者。苦格功令。公慨然曰。士子間關數千里。觀光上國。此朝廷收拾人心。一大機括也。奈何格之。議取同鄉結狀。俱得入闈。三月奉

旨。京官三品以上。遣子入朝侍衛。公顧謂己子曰。汝叔子恒豫。幼失母。吾與汝母撫若己出。當令叨是恩。以

識吾顧復之意。已而得除同知高郵州。戊子八月。調吏部右侍郎。己丑十月。加都察院右都御史。辛卯三月。轉本部左侍郎。八月。晉本部尚書。又以

恩詔加太子太保。由東西銓正位冢宰。凡閱歲者四。職掌所關。必求與吏治民生。大有裨益。至黜陟之際。鑑空衡平。無方隅。無德怨。處滿漢寮屬間。推誠相待。弗形一毫崖異之色。以故同事傾心。其用人之精當。他不具論。如趙公開心。以僉院起用。晉補左都御史。房公可壯。以前朝耆碩。久滯卿貳。特從副院。竟轉左都



御史龔公鼎孳。以奉常服闋來京。會有齟齬之者。越兩年不得補。公卽補爲館卿。凡若此。皆最愜輿望者也。後言路有撻拾銓曹事訐。

奏詞連公。公闔門謝客。疏請罪。

廷質之日。言者盛氣抗爭。公不與辯。惟以負國。負官。深自引咎。願早罷斥。

上鑑公無他。卒左遷言者。而堅留公。公之休容得大臣體。尤爲近代罕有。公姻家大司農戴公明說。先年貳司農時。無端落職。將外調。時公論咸抱不平。公心知

其冤。獨勸以人臣盡忠事主。勿計內外。且

明旨煌煌。須一行塞忌者口。遂補中州叅藩。戴公亦怡然就道。尋大著聲譽。甫踰年。膺

內召。公之不阿所親。而遇事卓然。有識槩可見也。孝廉有胞弟恒泰。年少負雋才。壬辰正月。遽以病卒。公痛之甚。五月。夫人姜氏。又久病繼革。未半歲。疊罹悲傷。復拮据銓務。靡有寧晷。遂以勞瘁得癩症。月每一作。乃具疏請告。

上弗允。十二月。以覃恩晉階光祿大夫。封三代如巳官。



癸巳二月。因前疾弗瘳。再請得

旨謝事靜養。隨蒙

遣使存問。飲食起居狀。并

命御醫調治回奏。未幾。特起內翰林弘文院大學士。疏

辭不克。奉有准調養十日。卽入院辦事之

旨。三月二十一日。

上幸內院。公偕同官行禮訖。正鵠侍間。疾忽作。

上瞿然色動。令左右諸大臣送歸邸寓。次日復上章懇

辭。准暫停給俸。以便調養。久之醫藥罔效。甲午正月。

方得

旨回籍。俟病痊。召用。九月初七日。爲望雲公七袞誕辰。

公父子祖孫。懽聚一堂。捧觴戲彩。宗戚鄉里。榮之。居

亡何病益劇。忽一日。書于枕次云。直心是大道。無將

迎。無繫戀。至十二月初二日。呼孝廉君。設香案。被朝

服。伏枕草遺疏。畧云。開經筵以懋

聖學。懲貪吏以拯民生。扶掖望

闕。叩頭。戒以易簣。賚奏。語不及私。初七日早。望雲公就

視。絕口不言病苦。以生老親憂。惟眉睫間。有悵焉不



忍離別之意。語孝廉君曰：汝去。我且休息。遂含笑而逝。公生于萬曆丙午年十一月初六日卯時，卒于順治甲午年十二月初七日辰時，享年四十有九。

天子覽遺疏，嘉其忠愛纏綿，為咨嗟悼惜者久之。下所司優議卹贈，以聞。嗚呼！跡公之生平，併觀公枕次所書之數語，其殆有得于道而深造聖賢之域者歟！公真不可及也。已。公性篤孝友，事二人色笑惟謹。雖盛夏隆寒，不冠服，不敢見。每侍左右，不命坐，不敢坐。終身如一日。視弟之子，逾已子。遇國有恩施，輒先及之。

與人交，表裏洞達，通而不阿，正而不諒。樂道人之善，而未嘗及其惡。

上之簡，公端揆也。有存心醇謹，行事和平之褒。嘉蓋灼見公之行，已立朝者，公洵能不負。

聖天子知人之明哉！休沐之暇，手不釋卷，博覽古今得失之故，究心天人性命之理。嘗命其子曰：有百行必求諸聖訓，無一事不可對天知。吾之志在是，吾之行亦在是。汝當終身識之。所著有西銘衍義、孝經釋畧、感應篇直解、行世公嘗為其邑請蠲荒地錢糧萬餘。



金除亡丁銀六千餘兩。邑人至今賴之。頻年宦京都。粥饑者。衣裸者。以至掩骼埋胔。歲以爲常。此又吉人爲善。惟日不足之。天性在他人爲之。則義聲震耀。便誇爲卓絕難能之事。于公之身。僅區區一端耳。嗚呼。公真不可及也。元配姜氏。原任陝西漢中府知府。文安姜公諱銓之女。先公二年卒。

誥贈

一品夫人。子二人。長恒懋。辛卯舉人。娶王氏。都察

院僉都御史。巡撫延綏王公正志姪。廩生翼聖女。次恒泰。邑廩生。早卒。娶劉氏。癸未進士。刑部郎中。劉公

世傑女。女三人。長適原任河南巡撫。公默之孫。廩生。公任之子。國學生。釗。次適原任臨洮府同知。姚公思虞之子。國學生。姚景申。三適原任汾州府推官。蕭公賦。穎之子。庠生。蕭濟美。孫男一。緝睿。官生。恒懋。出未聘。孫女一。恒泰。出未字。卜以某年某月某日。葬于某邑某鄉。爰爲之銘曰。

公生非偶。忠誠孝友。學本經史。材追駮駢。揚聲天路。編摩獨步。其典禮也。維直而清。其統鈞也。維簡而平。百司所視。



天子所器。方資濟川。胡不百年。有子繼武。有孫繩祖。積厚流光。公也不亡。

光祿大夫太子太保左都御史望仁徐公墓誌  
銘

順治十有六年歲次己亥秋。台州府大夫丞徐君諱  
祚煥泣持其先人總憲望仁公行狀來屬余誌其墓。  
而併爲之銘。以余與公同朝十餘載。且先後相繼同  
官。凡公之立朝行已。與夫生平敷歷中外之真品大  
業。炳炳烺烺。得之耳聞目見者。最爲委悉。余雖老病  
無文。誼不能辭。謹按狀。公徐姓。諱起元。字貞復。別號  
望仁。遼東遼陽人也。先世爲江南廬州府合肥縣人。



明初以軍功徙遼遂家焉世簪纓勿替遠不及詳公考明川公以孝友著聞遼左碩德粹履有陳太丘風公妣董太夫人淑慎柔嘉六行咸備生丈夫子一人是卽公公生而警敏沉毅少不好弄治麟經補博士弟子員試輒高等壬子登順天賢書癸丑下第歸益篤學礪行一時學者爭延致爲師今少傅萬涵賓公亦嘗從公受業庚申秉鐸山東淄川訓士之方悉倣胡安定公先德行而後文藝淄川士習蒸蒸一變辛酉丁外艱服闋補河南閩鄉諭所以訓閩士者如淄

閩弟子愛敬而信從之亦如淄已已授湖廣保康令保康彈丸邑戶不滿三百皆家鮮宿春一切日用所需必取辨隣壤又居萬山中巖谷遑迴往來甚艱公爲百計籌畫置立集場平其關石通其有無俾強暴不相侵智巧毋相奪商賈麇至邑民賴以稍蘇邑南有湯峽河可以達大河抵襄陽奈萬蓮洞口有巨石噴岼橫塞河泓公審觀形勢令居民沿山伐竹木烈而焚之不三月間巨石剝落殆盡卽五丁開山神力當不過此于是峽平水注凡入山採木者順流而下



直達樊城。可得倍值。地方至今猶蒙其利也。壬申丁  
內艱。丙子補湖廣應山令。時流賊起自秦隴。蹂躪楚  
豫。勢方披猖。而應適當其衝。公蒞任。察城守之具。百  
無一備。爲之築垣濬濠。修櫓繕器。捐橐中資。募壯士  
千餘人。躬自簡練。務人人可用。以防不虞。未幾賊渠  
八大王張憲忠突逼孤城。公親率壯士邀擊。屢戰獲  
捷。所得甲仗。畜無算。賊鋒首挫。忿圖報復。羣賊如  
闖塌天。整世王一斗粟。滿天星老。徊徊等環集城下。  
悉力仰攻。公爲整備火器。乘城禦之。神暇而氣壯。賊

咸失利去。比應之隣邑。望風降賊者衆。獨公固守。四  
載屹若金湯。匪但治行卓越。爲諸道最。而武功赫然。  
尤一時艷稱。未有已。卯冬大計吏撫按交章薦剡。爭  
言當大用。公了此賊不難。會閣部督師至。亦素重公  
望。題授鄖陽同知。管鄖鎮餉。時鄖兵萬餘屯住竹山。  
縣自鄖至竹。六百里而遙。河身淺窄。以小舟溯流牽  
挽。歷灘百二。計半月方達。又大帥左良玉馬步兵三  
萬餘屯興安縣。亦移竹就糧。較原住竹兵數且三倍  
焉。公慮兵多糧匱。不免庚癸呼。乃向治院繼成袁公。



假步兵五百。晝夜協運。七日即至。以蕞爾山邑。屯兵數萬。轉餉不竭。公之力也。適太守缺。當事者舉公署府事。旋實授。公感激奮勵。于戰守機宜。靡不殫力。料理。辛巳八月。張憲忠領賊眾數萬攻城。公備禦已預。用火器中其左臂。賊踉蹌走。壬午十二月。闖賊李自成。從白馬洞渡江。攻陷襄陽。而南陽承天荊州等處。所過州邑。俱望風瓦解。湖北半楚。孤存一鄖耳。賊意且輕鄖。遣騎萬餘。徑抵城北安營。以為鄖可旦夕下也。公督率壯士。躬冒矢石。出敵不意。直躡其營。所殺

傷凡三千餘。賊乃宵遁。癸未二月。賊驍將劉宗敏等。統馬步五萬攻城。三面環遶。其鋒甚惡。公約眾歃血。誓曰。今日之事。有死無二。且歷數某處某處。順賊者。卒被慘戮。將士為之感動。皆泣下如雨。無不一以當百。乃部署諸將。分方迎敵。終日對仗。凡枕戈擐甲者。七十餘日。賊死傷過半。竄歸襄陽。癸未四月。賊復來。用麥杆雜土。于黑夜築臺三層。距城百步許。高與城齊。計四十五座。駕砲擊城。城內人望而却立。勢且岌岌。公謂諸將士曰。鄖之存亡。在此舉矣。與其嬰城兀



守。曷。若。以。戰。爲。守。而。守。乃。固。于。五。月。三。日。傾。城。兵。出。戰。用。火。礮。火。箭。燔。燒。麥。臺。頃。刻。而。四。十。五。座。立。燼。闖。賊。聞。之。親。督。精。銳。來。援。行。至。浙。川。知。火。器。精。利。且。士。皆。殊。死。戰。度。弗。能。敵。因。轉。鄧。州。回。襄。陽。尋。渡。河。入。豫。迎。敵。孫。督。秦。兵。秦。兵。不。戰。而。潰。遂。乘。勝。入。關。中。據。險。僭。亂。當。是。時。鄧。西。北。偏。漢。中。興。安。商。雒。一。帶。處。處。署。有。僞。官。獨。鄧。陽。孤。鎮。四。面。皆。賊。內。無。糧。餉。外。絕。救。援。如。撐。漏。舟。于。瀾。天。駭。浪。中。不。覆。溺。者。幾。希。是。年。秋。廷。議。錄。公。之。功。擢。陞。副。使。隨。晉。鄧。陽。撫。治。公。益。感。知。遇。

嘔。心。經。理。寢。食。靡。遑。時。鄧。所。亟。需。者。火。藥。公。乃。令。各。營。俱。設。礮。房。掃。土。淋。煎。而。礮。足。矣。礮。不。給。乃。用。火。酒。熬。礮。功。與。礮。等。礮。足。矣。鉛。又。不。給。乃。募。市。廢。鐵。設。法。鼓。鑄。圓。如。走。珠。自。是。火。藥。不。勝。用。矣。從。襄。陽。陷。後。餉。道。梗。阻。公。多。方。曉。諭。居。民。俾。悉。出。蓋。藏。樂。輸。靡。後。不。數。月。而。民。間。儲。蓄。告。罄。又。倡。率。寮。屬。竭。力。捐。濟。不。數。月。而。官。橐。又。罄。惟。相。率。拾。野。菜。剝。榆。皮。採。橡。實。聊。以。充。腹。僅。免。易。子。析。骸。耳。公。偵。知。賊。有。糧。艘。屯。河。下。募。死。士。夜。駕。小。舟。順。流。而。下。乘。其。無。備。奪。取。賊。船。賊。窘。



攻城益急。護糧益堅。公又夜遣人以火箭焚之。賊糧悉盡。甲申正月。闖賊以郟久不下。復令驍將路應標等來攻。計四十七晝夜。公身先士卒。奮勇堵禦。斬馘無算。賊將僅以身遁。三月。又令賊下得海等。益兵萬餘來攻。仍敗遁如前。五月。又令驍賊武寅臺等二人來城下要盟。云中原大勢已去。孤郟在重圍中。糧盡援絕。能支幾時。盍早自全。公義憤填胸。卽城下斬之。誓不與賊俱生。賊知公忠義難撼。甚于城堅不可拔。乃更益兵列營爲持久計。公復出奇謀多方以禦之。

夜襲以擾之。使賊片刻弗寧者六閱月。賊憊莫支。退營楊溪。舖別築土城自守。時縱遊兵突城下。公應之愈暇。愈整。每偵賊出營。卽遣奇兵迎敵。以挫其鋒。十二月六日。公親統銳卒薄土城下。索戰。復密遣人入賊營爲內應。夜半火發。內外夾擊。賊大窘。開東門逃竄。乘勝追擊。殺傷殆盡。賊帥路應標殲焉。方期露布告捷。而明代已革。九閱月矣。嗟夫。明以天下之全力不能守其九廟。而公未嘗擁重兵。資厚餉。獨以兩袖清風。一腔熱血。守張巡許遠之所不能守。終明之世。



中原板蕩孤。郎屹然以待。

皇清定鼎之日完。而歸之。猗歟偉哉。今

天子嘉公全城殊績。仍令撫治如故。公為起瘡痍。集流散。戢綏彌至。于是鄖之人。感公福澤。家尸戶祝。特為畫像立祀。丙戌擢都察院左副都御史。協理院事。公廉有聲。戊子陞掌院事。左都御史。己丑晉階太子太保。正直和平。始終如一。不矜圭角。人自不敢干以私。辛卯公念明川公已葬淄川。而董太夫人櫬尚寄金陵。因乞假迎歸。合葬于淄。壬辰。

聖上眷倚老成。仍命以原官管大理卿事。公循例引年蒙

恩許允。典禮優渥。公始得以險阻艱難。備嘗勞瘁之身。卜別墅于都城西南隅。負郭臨流。稍憇息焉。每佳辰月夕。與親朋握手道故。浮觴嘯咏。竟日忘倦。白鬚飄然。顏赭若童。人望之。羨為神仙中人也。戊戌九月初五日。竟無疾而逝。嗚呼。公之為人也。軌步趨矜。然諾孝友。篤自性。生忠義。助以學問。衾影夢寐。恒自期為聖賢。教人子弟。亦期共為聖賢。自起家縣令。以至建



牙開府無不身視民家視國故百姓愛之如父母士卒護之如頭目以之守城城完以之攻賊賊破豎蓋世無前之偉烈垂千秋不朽之令名然未嘗沾沾焉向人稍有德色至歿之日囊橐蕭然幾無以殮此在他人爲最難得者清節于公之生平直其一端也若夫待昆弟無爾我撫諸姪若已子九世同居不析箸緩急族黨靡有厭倦心則又皆公制行之緒餘已公生于萬曆乙酉年七月二十六日未時卒于順治戊戌年九月初五日卯時享年七十有四卜于某年月

日。塋于某所。元配趙氏一品夫人。生子一。卽祚煥。以侍衛歷官台州府同知。甫蒞任。一日卽值海賊陷城。賊逼降。抗不受僞職。卒護憑赴省。此蓋得于公之教。忠者素也。生女一。適海州守忠鵠李公。長子一元。候選縣令。繼配郭氏一品夫人。生女一。未字。祚煥配卞氏。平定州守圖閣公女。繼楊氏。瓊崖叅將苑青公女。繼董氏。貢士峻明董公女。孫一天培。配甯氏。內閣大學士萬涌公女。姪國禎。任磁州叅將。祚炳。任清苑縣令。姪女二。一適山東巡撫青藜耿公。姪子明。候選京



職一。遂江南。梁無君。砥蔣公長子。爲之銘曰。  
公篤生。今稟星辰。公制行。今侔古人。公司鐸。今安定。  
均。公烹鮮。今召杜倫。公建牙。今威且仁。公禦寇。今若。  
天神。鞏孤城。于磐石。今傲殉節之張巡。雖世代。忽滄。  
桑。今賴忠義之獨伸。垂紳正笏。以肅紀綱。今憲度維。  
新。屈指懸車。而娛泉石。今二百餘旬。生也榮死也哀。  
今輝茲貞珉。歲可遷石。可朽。今芳名詎淪。

光祿大夫太子太保工部尚書管都察院左都

御史魯齋霍公墓誌銘

順治十有八年。歲次辛丑。夏四月。左都御史魯齋霍  
公卒。其孤恩蔭君將扶櫬歸里。經營窀穸。而以其狀  
來請。余銘且泣告曰。孤奉先君子遺命。銘我者必先  
生也。余聞言。不覺涕泗交頤。憶余與公先後同朝。二  
十年。世閱滄桑。交情有如一日。習公最悉。佩公最深。  
誼不忍辭。按狀。公諱達。字非聞。號魯齋。始祖武節大  
夫諱吉者。本居真定府之南宮縣。至四世祖諱玉侍。



父端祐公。宦遊秦隴。因家麟遊。遂世爲秦人焉。六世祖諱瑞。遷鳳翔。逮數傳而諱導者。是爲公王父。徙武功。公考貞吾公。諱正始。家長安。妣閭太夫人。實生公。公生而穎異不凡。六歲卽解句讀。恒善病。太夫人育且誨之。辛勤倍至。無何太夫人病革。公甫七歲。哀慟呼搶。迫于至性。觀者無不嗟異。是年冬就外傳。目輒數行下。塾師奇之。繼母徐太夫人。視公無異已生。公爰克成立。歲十九。補博士弟子員。旋食餼。蔚然有聲。督學使著。每試輒優其等。甲子薦于鄉。辛未成進士。

本年七月。除山東淄川令。冬十一月。有脫伍悍卒。自吳橋譟廻。所過焚掠。連陷數城。齊東大震。時公新任。方詣省謁諸臺使者。聞警星夜馳還。整頓城守。不五日畢具。及譁兵抵境。知有備。輒引去。淄民安堵如故。撫按以守禦功。上聞。適徐太夫人訃至。公擗踊哀號。亟請解綬奔喪。當事者以賊勢方張。城守捍禦。非公不可。疏留不獲行。抑哀備賊。凡七閱月。得代回籍。喪次哀毀逾節。先是公以寒素通籍。筮仕未及週。窮約甚于諸生。多方拮据。情文俱備。宗族鄉黨咸稱純孝。



焉。乙亥服除。補山東曹邑令。時流寇披猖。曹首當其衝。自莅任後。寇突河干者五。公設方畧。嚴兵待之。寇憚不敢逞。境賴以寧。爾時大河兩決。奔流激射。汎濫桑田。民幾魚矣。公爲繕隄防。疏壅滯。卒殺水勢。畚鍤無患。用是勞績茂著。兩奉截俸行取之旨。丙子甫入闈分校。寇復逼河干。總河檄公星回堵禦。詰獲三奸。細遂過河。奮勦斬四級。寇懾息遠遁。優叙其功。以聞。丁丑冬。考滿。公考妣均封如其官。戊寅十一月。廷議各舉邊才有司。就近調補。以鞏固畿輔。僉謂公才望

堪勝。將調寧晉。曹民間之。遮道攀轅。總河復疏留守曹。遂止不調。曹城頽圯。有同短垣。可踰。城內居民鮮獲寧止。公設法督葺。不鞭一人。不費民間一錢。浹月竣工。至于絕火耗。鋤蠹豪。講學勸農。凡爲良吏之種種美政。于公直餘事也。迄今曹之父老。猶媿媿言之。已卯四月。聞父喪。趨戒行。抵里撫柩痛哭。幾不欲生。殫力從厚。以襄大事。奉兩太夫人合塋于曲江之原。辛巳服除。赴闕候考選。以召對稱旨。授試江西道監察御史。巡視西城。時丁明末。士大夫方隅恩怨。物而



不化。情面賄賂。溺焉忘返。公獨凜凜以正氣自持。不  
徧不隨。糾彈權貴。未嘗稍假。有真御史之稱。比時漕  
政弊極。東南四百萬石之玉粒。嘗踰年不得登天府。  
一則寇氛充斥。運河漕艘莫敢前。一則河流淤淺。苦  
蔓草糾葛。輓洩無計。而其原皆起于有司之徵兌愆  
期。運弁之驕橫不法。奸旗之恣意盜折。上赫然震怒。  
下令曰。漕務等于軍機。凡大小漕臣。有安常襲故。莫  
能挽遲爲速者。必罪不赦。于是冬十二月。特簡公巡  
漕。余時備兵南昌。已移固原。將行。會漕科偕撫按合

疏。留督江西糧。不得已。黽勉從事。與公周旋。漕務者  
一年。見公所措置。嚴而不苛。廉而多惠。軍民屬吏。皆  
畏之感之。是年漕艘悉抵通。卒如令。挽遲爲速。公之  
力也。上書公名于御屏。眷愛有加。壬午。以督運功。實  
授御史。加俸一級。癸未。又以守護白糧功。加一級。繼  
而寇陷關中。遠邇震驚。總憲吉水李公。保奏公監總  
督軍。公計恢復關中。非重兵不可。因度淮。招集將士。  
用圖大舉。甲申。難作。一片忠肝。義膽。竟付之東流矣。  
乙酉。以浙閩總督張公薦。奉



旨着來京陛見。丁亥授山東道監察御史。戊子巡按福建。時地方初席版圖。人心搖搖。公疏舉賓興。偕兩典試。闢榛莽而入。肇舉賓興大典。以收士心。仍宣

上德意。家喻戶曉。而入閩之風鶴大定。辛卯。

先皇帝親政。磨勵人材。內外兼轉。以公才優幹濟。補嘉湖兵巡道。山陬湖畔。正多伏莽。所在竊發。公一至。縛渠宥脅。寇孽屏息。一切剔蠹除奸。得其要領。不事鈎索。境內肅清。吏治民生。咸蒸蒸有起色。癸巳。大計吏。督撫按會舉卓異第一。

上下部覈實。賜宴賜袍。晉太僕寺少卿。甲午轉太常寺少卿。提督四譯館。七月轉大理寺少卿。乙未三月。陞本寺正卿。讞鞫多所平反。人稱不寬。

先皇帝謂督捕一官。非嚴明仁恕。兼而有之者。弗克勝任。四月。陞兵部督捕右侍郎。此官設自本朝。尚以緝逃懲窩。充實禁旅。不意營窟彌深。根株彌濫。不得不特立嚴法。冀法重難犯。乃有以一人之逃。而株連數家。有以無知之僕。而干累職官。甚且假稱逃人。嚇詐善良。而地方百姓。多罹籍沒竄徙之重條。然各旗報



獲之數。卒不勝報逃之數。

先皇帝每爲惻然動念。頻頒

諭旨。講求良策。自公受事。卽條上便宜數十款。嚴窩藏之律。立黥刺之法。定考成之例。申保甲之令。著爲令典。于是有司爭自濯磨。愚民亦懼扞網。數年來逃者無所容。假者不得肆。地方旣鮮株連。職官亦免于累。所全活人不可數計。丁酉六月以

恩詔加一級。戊戌十一月考滿。加兵部尚書。給與應得誥命。廕一子入監讀書。己亥三月奉

上諭。加太子太保。庚子二月。調工部尚書。時

先皇帝欲合祭

地於大享殿。限一月竣工。公竭蹶以圖。如期告成。七月奉

旨。仍以太子太保。工部尚書。管都察院左都御史事。公感

先皇帝知遇之恩。膺紀綱重寄。殫力振作。不辭勞瘁。凡有裨民生吏治者。必昌言無隱。冬十月。遂患痰疾。猶勉強辦事。十二月。疾勢漸劇。今年正月初八日。痛遭



先皇帝賓天。力疾哭臨。勉竣喪禮。病益篤。及回寓調理。醫藥罔效。竟爾溘焉長逝。嗚呼。公真可謂鞠躬盡瘁。以死勤事者矣。公通籍三十餘年。除兩次讀禮家居外。餘悉歎歷仕途。憂公思職。無一優游晏衍之日。出為外吏。則洞悉民隱。芟除奸盜。所至見德。所去見思。入為京朝官。則諳習國體。明解朝章。氣節稜稜。儼不可犯。而胸無城府。益然迎人于光風霽月之中。雖位躋三事。年逾花甲。而猷畧未竟。精力方旺。胡期昊天不弔。遽奪我老成典型。令人翔顧班聯中。悵然失所。仰止嗚呼。誠深為可痛也已。訃聞之日。兒童走卒。盡為咨嗟涕洟。

上深悼焉。俞禮臣請祭葬。悉如例。元配可夫人。並得祔葬。仍遣官護其喪歸。生榮歿哀。保有令名。以終。然則公抑又何憾也哉。公于學無所不窺。政事之暇。沉酣經史。搜稽典故。旁及竺乾諸書。靡不探微抉奧。所著有屈黃二騷合編。手校字彙。併楞嚴金剛經註解。行世。近有編訂史記一書。尚未付梓。公生于萬曆庚子。卒于順治辛丑。享年六十有二。公祖若考。皆贈資政。



大夫兵部尚書母閔氏徐氏皆贈二品夫人元配可  
氏贈二品夫人。生丈夫子一。卽恩廕君于京。娶辛未  
進士通奉大夫江西右布政使任公中鳳女。繼配紀  
氏。生女一。適甲戌進士中憲大夫山東提學道任公  
中麟三子貢監生知民。繼配袁氏。封二品夫人。側室  
崔氏。吳氏。皆撫教恩廕。君不異已出孫一。昭尚幼。爲  
之銘曰。

天挺鉅公。維霍司空。起家民牧。兩最齊封。晉秩栢臺。  
蹇諤著節。乘驄督儲。轉運若決。八閩持斧。手闢荆榛。

招携懷貳。惠洽海濱。嘉湖二郡。伏莽淵藪。借公備兵。  
革心恐後。卓異彰聞。增秩賜衣。京卿屢陟。羣望攸歸。  
特簡佐樞。矢口石畫。誘致逋亡。如依衽席。稽核水農。  
糜冒悉釐。領袖風紀。澄清是資。展也老成。高止是仰。  
九原不作。曷深愀惘。

皇有卹恩。瞻懷名碩。歲月遷兮。我銘無斁。



光祿大夫太子太保弘文院大學士蒼忱呂公墓誌銘

康熙六年歲在丁未二月朔故太子太保弘文院大學士蒼忱呂公歸葬於常州府武進縣繆賢壩之新降其子恩蔭生方洪等叙公生平懿實來乞余銘其墓嗟乎呂公自登第以後出入中秘者六載晉登揆席者一年與余後先同官寅恭交勵惟余最知公惟公亦最愛余惜公先以病去于時

朝廷眷公甚厚中外咸倚重公謂公年方強仕且晚病



且愈當膺

命還朝。一竟匡勦太平之業。孰意夙疾糾纏。卒至不起。嗟乎。余何忍爲公銘。然余與公。旣相知久。且厚。且濫職舊史氏。于大臣宰相。名言嘉行。並宜得書。余又何敢不銘公也。謹按狀。公姓呂氏。諱宮。字長音。號蒼忱。別號金門。爲常州武進縣人。其先世自漢尚書霸。累傳至宋。如文穆。文清。皆以賢宰相著。嗣後不乏名臣。具載史冊。不勝書。至洪武永樂間。遷居郡城。又六傳。至公。大父遂南公。諱應徵。好修積行。多隱德。公考

敕贈修撰待贈光祿大夫翼之。公諱程雲。學富才高。膏

志未酬。公妣

敕贈太宜人待贈一品太夫人諸氏。婦道母儀。則儆里黨。發祥厥有其自矣。公童年穎異。目數行下。遂成誦。不忘甫四齡。考早世。從大父授書。不離膝前。常以方名書記粘示隅壁。每夜繞隅。燃燭示之。公輒神會。是時公方零仃孤苦。而大父喜甚。以爲是必能大吾門也。迨就外傳。卽好讀書。八歲屬文。有能名。公母教甚嚴。丙夜督課。親績紡以伴之。公痛念孀母。望子殷切。



力學之志彌堅。斷齏焚膏。刻自勉勵。性冲淡無所好。與人藹若春風。坦無城府。而持身方正。不愧屋漏。嘗于某氏館中夜讀。有鄰家少婦。忽乘月而至。公毅然峻拒。不稍動心。次日復令侍婢持雙玉魚來贈。公卽碎其玉而厲聲責之。婢慚而退。然未嘗與人言其事。及後課子。因訓曰。讀書人。積陰德。爲上。我曾遇某事。云云。然終不洩其姓名。少時不利童子試。年二十七。始補博士弟子。請于母氏。以居諸易邁。顯親無期。不得不離家習靜。以圖一當。遂至金陵。遠公菴閉關攻

苦者三年。至癸酉試南闈。時漏下四鼓。僅完六義。覺神思困倦。睡魔來牽。忽有人撫其背曰。如何不作文。遂驚寤。見巨人昂立。倏失所在。時天已將曙。提書而出。是年登賢書。受知于楚中徐中濤先生。主考閩中。蔣八公先生評牘云。一縱一橫。論者莫當。得眉山之神理。蓋公沉酣古學。尤篤好大蘇。爲文奔騰激射。宛轉迴旋。不可方物。故評卷云云。旣而困公車者一十五年。研精苦思。益發憤揣摩。至甲申乙酉間。尤加刻勵。無間酷暑嚴寒。宵旦不輟。甚而繼以泣。且泣且讀。



金之通公集 卷十一 墓誌銘  
卽懸針刺股。不是過也。迨

皇清啓運。丁亥應春官試。初成三義。殊不愜意。午過卽束卷欲出。鄰號勸阻。復靜坐構思。一揮而就。淋漓滿志。恍有神助焉。及

廷對。辰值大雨。遺去銅格式。同輩爲之惋惜。旣而濡毫落紙。精整異常。字或將訛。若有掣其肘者。輒得改正。自鄉會迄奏對。累著奇兆。具詳公勸戒士子文中。不可謂非陰德之驗也。

賜擢第一。授翰林秘書院修撰。邀

聖恩知遇。時人榮之。而公退然如未遇時。出入承明。謹愆有加。鄉邑中曾不知有鼎魁也。歲辛卯。恭遇

世祖章皇帝臨朝親政。公奉

命頒詔江南。乘傳錦歸。畧無德色。意里人益加重焉。壬辰舉春官試。公與分考。所鑑拔房卷。醇正爾雅。時有廬陵較士之譽。是歲遷右春坊右中允。時

世祖章皇帝特召館員。親試君子懷德論。請建常平倉。疏條對上呈。獨公當

上意隨奉



傳諭云。翰林官陞轉舊例論資俸兼論才品。朕思果有才品出衆者。何必拘舊例。右春坊右中允仍管秘書院修撰事呂宮。文章簡明。氣度嫺雅。朕所親見。着遇學士員缺。卽與推補。以示破格用人之意。遂超陞學士。不半載。晉右少宰。公益勵冰檠。

帝眷彌隆。歲癸巳冬。特進弘文院大學士。甲午春二月。余亦由中銓。濫厠公後。獲與公晨夕周旋。公以文章氣度受知。

天子。參預國是。言無不當。議無不行。凡所以上裨。

宗社。下福蒼生者。惟公協贊之力。居多用是。

天子嘉焉。萬幾之暇。時召入大內。發古今書畫。命公題贊。又命遍題內宮額。聯公乘機納牖。因事進規。格言莊偶。盈列禁中。誠得大臣以道事君之要也。公以六年翰撰。邀異數。驟登揆席。一時忌者。不無間言。公絕不尤人。惟翼翼引咎。力求罷斥。幸賴。

天王聖明。燎若觀火。勉以盡職。用息多口。然機務殷繁。積勞成瘁。痰火交作。兼患疝氣相攻。苦不能支。歲甲午六月。具疏請假。十四日奉。



旨覽卿奏知道了。着用心調理。稍痊即出供職。隨令御前大人臨寓。慰問。繼遣太醫診候。屢賜珍藥。

親諭火灸可療。隆恩篤眷。真不啻家人父子。至九月未痊。復具恭陳謝悃一疏。十五日奉

旨覽卿奏知道了。着用心調理。稍痊即入值辦事。十月有微臣痼疾難愈。一疏。十七日奉

旨卿用心調治。不必求罷。十二月有病劇萬難供職。一疏。初五日奉

旨卿還安心調理。病痊之日。照舊供職。公既屢疏乞休。

未蒙

俞允。乃

恩眷逾涯。歲乙未正月十日。特晉太子太保。十八日有寵命。不敢仰承。一疏。二十日奉

旨晉加新銜。特昭眷注。卿其祇遵成命。不必遜辭。時公病日劇。復

命總裁

順治大訓。公以疾辭。二月有病劇。萬難供職。一疏。

聖意實知。公病重。勢難勉留。十三日奉



旨覽卿奏病難速痊特允所請着以太子太保新銜回籍調理病痊之日候旨召用仍賜衣服鞍馬還馳驛去昭朕優眷至意二十日具疏謝

恩二十二日奉

旨覽卿奏謝甚切朕懷須益加調攝務期痊可以慰眷

注公還里甫閱歲

上念公不置于丙申年一月特遣內官王應聘

御前近臣王有恒賚

敕存問賜羊酒

敕云卿受朕深知早參大政而能不阿不激小心匡贊一載綸扉多所裨益迄今間濶年餘彌深軫念卿其慎起居為國家愛身佇需召用公感念

厚恩涕泗交頤恨捐糜莫報自此杜門却掃日從事藥餌間暇則訓諸子勉以忠勤孝弟嘗曰功名事不可強求當修天爵以俟人爵吾自童子試以至入相及蒙恩賜歸從未曉干求二字今世俗囂薄苟且功名將來闡試必有大禍爾等當潛心聽命勿生非分之冀及丁西南北闡事發言若左券又嘗諭子早完國



課云江南官戶多逋欠。將來必有創懲。并以此勸告親友。不久卒于奏銷。悉如其言。居鄉十載。嫉俗尚之侈靡。力行恭儉。以身為士民式。居取容膝。食無兼味。羔羊素絲之節。位彌尊而守彌固。癸卯歲。

世祖章皇帝梓宮入山陵。聞余匍匐馳送。公力疾偕行。時有淺識者從傍竊議。公弗顧也。比扈從至山陵。哀號攀慕。余兩人相對痛心。悽動班聯。從

山陵回。公即嘔血數升。以炎暑勞頓。病遂增劇。旋于五月初十日。偕余辭。

朝。同歸長途並轡。不減夙昔之追隨。綸扉時親笑語。而余已察公之病勢。覺有進無退矣。歲甲辰。病益甚。旬日著格言數章。垂勸世俗。刊布流傳。四月十八日之夕。忽呼諸子云。吾欲去矣。只受

朝廷厚恩未報。柰何。北向九叩而瞑。曾無一語及家事也。嗟乎。公四歲而孤。奉母氏教。黽勉下帷。雖名列賢書。嘗寄居蕭寺。夜分更闌。呶唔不絕。甚而或繼以泣。其劬勞罔極之思。纏綿痛切。有如此。若夫子處孤館。拒少孀之乘。月窺戶。以至碎玉却婢。而終身不言其



人其心事正直忠厚可以告天地而質衾影有如此受知

聖主重其文章氣度超陟揆輔不色喜偶蒙譏于甘食不色愠其蘊藉沉深學識凝固上足以結

主知而下足以協輿望有如此至其奔赴

山陵號慟慘怛卒至鋼疾遍發嘔血增加臨革之言忠

勤出于至性此又蓋臣事君之大節生死無二者矣

余與公交十餘年見其恬靜冲和嘗歆然若不足而

識見明確然諾可否介石不回喜揚人善不向叱人

過下御臧獲亦惟寬恕為先平生干請之戒甚嚴而

故人寒士有負奇冤莫白者輒不惜冒嫌拯之總之

公律已也介與人也溫事君也忠交友也信嗚呼凡

此皆有合于聖賢之道者公真不可及也已公生于

癸卯年之八月二十四日戌時卒于康熙甲辰年之

四月十八日亥時享年六十有二為之銘曰

卓哉呂公四歲而孤母教是奉黽勉勤劬沉酣墳典

寒暑弗逾夙興夜寐孝思瞿瞿持躬正直昏暮罔渝

積德于陰爰顯屢符擢天下魁猶寒素如



先皇右文器公大儒詞翰寓規警戒盤盂晉陟銓佐翼贊

廟謨以疾請告妬口揶揄

帝鑒厥誠寵賚有殊

隆恩存問曠典古無公感知遇遑恤瘁瘖癸卯

山陵負疾長驅撫膺一慟捐生是愉大節細行毋有稍

踰德大必壽胡公未孚殆昌于後子孫攸訏毘陵之

陽繆賢之隅我銘公藏千載為模

金文通公集卷之十二終

金文通公集卷之十三目錄

吳江金之俊豈凡著

前中憲大夫福建觀察使菊存張公墓誌銘

前光祿大夫太子太保戶部尚書靜涵張公墓

誌銘

贈通奉大夫內翰林弘文院學士岐山朱公暨

配封夫人沈氏合葬墓誌銘



誥封中憲大夫浙江按察司副使幼儀秦公暨  
配華恭人合葬墓誌銘

金文通公集卷之十三

吳江金之俊豈凡著

前中憲大夫福建觀察使菊存張公墓誌銘

公諱晉徵字恭錫號慕蓼別號菊存其先世實宋魏  
公裔自南渡後數傳而至諱辛三者徙居禾之太平  
里遂為嘉興人辛三生洪洪生正正生世華世華生  
用字柳溪以次子貴封戶科給事中生三子長諱應



潮字海濤。邑廩生。生子棐。字心日。邑廩生。生子廷薦。字履台。登萬曆辛丑科進士。歷任刑部主事。次諱應治。字冲泉。登嘉靖壬戌科進士。由給諫。歷任山東臨清兵備副使。李諱應濂。字衍溪。邑廩生。卽公大父也。公父諱槃。字碩懷。邑庠生。以公貴。贈福建觀察使。生子三人。長卽公也。公生甫七日。妣曹恭人見背。考碩懷。公同王母杭太孺人。撫恤成童。六歲就家塾。性穎異。不好爲群兒弄。公家世取甲第者。皆以壁經。贈公喜公慧。因卜所授經。獨麟經協兆。爰從伯氏仲銘公。

手授四傳。目數十行。下無少遺忘。天資旣敏妙。而又潛心鮮他嗜。一時宗族戚屬咸識其爲大器。年十七補弟子員。聲蔚庠序。年十八。丁繼母卜恭人艱。哀毀逾節。讀禮之暇。輒發憤自勵。呬唔丙夜。不息。其爲制舉義。必洞抉題旨。匠心破的。不屑屑襲時吻。歲辛酉。入棘闈。本房司理鄭君拔送主司。以策語微激抑之。下第歸。公志益奮。學業亦日益進。乙丑春仲。贈公忽遘疾。捐館。公號痛欲絕。偕仲弟萍止。共襄喪葬。比時家業蕭瑟。自勉營窀穸後。爲門戶計。至艱辛也。季春



贈公舉遺腹子。卽季弟躬鑒。撫育之如已子。延師訓迪。卒克成立。雁行三人。雖長幼差殊。怡怡友恭。曾無間言。公因家食不支。館穀黎川。半邏者累歲。悉以家事聽次公料理。舌耕硯田。意泊如也。庚午登賢書。出蔣慕皆先生門。特以麟經受知石齋黃太史。辛未。殿羽歸。讀書茗溪。益奮發如諸生時。甲戌成進士。爲管誠齋仲子復兩先生所拔。釋褐除知閩縣事。閩居省會要衝。冗務如蝟。案牘山積。夙號難治。公淬礪新硎。圖之。諸凡民瘼利弊。嘔心講求。力任興革。夙夜拮据。

不遑。會海孽劉香大吹鯨浪。賴公轉餉軍前。獲資飽騰。事平紀功。因首及焉。丙子大比。士爲本省房考官。得士六人。皆一時名宿。適石齋黃太史講學樵桐山。岱嶽自矜於邦之賢士大夫。鮮所許可。而獨景重公。逢人說項。於是聲益起。無何。中丞某憑寄耳目。構求洋事。頗多株累。公洞燭而心寬之。毅然曰。殺人媚人。吾不能也。因而釋者甚衆。拂當事意。調新安之婺源。簡僻易治。然公未嘗有易心。其殫精惠愛。猶之治閩也。不二載。擢刑曹。部例提牢屬新咨。公適膺其役。正



值石齋先生抗疏獲罪。廷杖詔獄。公慮朝廷有殺諫臣名爲之維持救護。不遺餘力。匪僅以師弟情誼效流俗之周旋也。轉員外郎。恤刑中州。公念人命至重。死者不可復生。斷者不可復續。加意平反。全活倍多。今恤疏具在。仁人之言。不與歲月俱逝也。時流氛孔熾。河洛一帶。尤被蹂躪。公雖無城守責。恒與守土諸司環甲登埤。一日夜常數十驚。未嘗以使客偷安置地方於膜外也。繼以才望出守江西之建昌。益藩府第在焉。藩素擅賢名。爲各藩冠。而時方隆重。藩體勢

焰頗張。伺察督責。綦嚴且密。稍忤意。卽飛章劾奏。動得重譴。有司多救過不暇。公事事謹。不開以隙。遇有事關民社者。是非可否。公屹然持之。不爲所撓。藩亦甚敬而愛之。署巡道篆。賊正流毒袁州九江。鋒不可嚮。聲言窺建昌。警信日迫。人心惶惶。益藩有暫徙樵川之令。公陳大義。攀轅莫止。亟飭將卒護行。以司理黃君隨。民爭竄徙。城中爲之一空。公獨以隻身死守。繕器械。募鄉勇。嚴備禦。密間諜。常單騎巡城。指郡門一井。誓曰。設有不測。當覓我骸骨於此中也。軍民



咸泣下。邏警晝夜不懈。公雖身駐盱江。所轄撫屬諸邑。密邇袁界。公飛檄偏裨。統兵預扼要害。賊偵知有備。未及境而遁。遂啓請藩歸。先是藩行時。被土寇渠首曾斗墟等。劫貲鉅萬。時城守方嚴。恐搜捕太急。激生他變。姑置不緝。遂陰行察訪。廉得主名。密授所司方略。乘雪夜掩襲。群盜以次就縛。立置之法。餘脅從悉縱弗究。追餉完藩。安堵如故。合郡紳民。勒石紀功。督撫交章薦其能。冢宰徐虞求先生歎曰。張太守以白面書生。保全孤城。翼衛藩室。曾無勁兵宿將。爲之

犄角聲援。真奇男子也。擢福建按察司副使。備兵建南。地方久弛武備。緩急靡恃。公勵精整頓。軍容肅然。咸稱閩南一重鎮。云旋陞按察司使。時有驕兵悍將。爲民害者。公治之如律。不稍貸。外臺之綱紀。聿張實於公有厚賴焉。未幾。

王師入境。公識時投誠。繳印謝事。旅寓他離。茹苦萬狀。丙戌秋。孫恭人抱病長逝。長子亦復不祿。骨肉摧傷。相繼而至。復遭僞寇竊發。幸公素得民和。獲免於難。琴鶴之外。罄飽賊掠。時相從患難中。四顧無依。惟季



弟躬鑿一人而已。戊子還里，憂毀困頓之餘，形神交悴，堅臥一丘，無復用世意。慕陶靖節之高風，自號菊存，以見志焉。終日杜門，卻掃書史，是親間從二三朋舊，道故言歡，風清月朗，相與嘯傲，鴛波恒樂而忘返。除公事入室外，曾無片紙寸牘，干及當事，以是人競高之。連舉二胤，旋復夭殤。天道其可問耶？公深自訟，省益孳孳，累善爲事。戊戌春，王舉鄉飲大典，郡大夫素式其賢，特徵重大賓，輿論僉允。己亥菊月，舉一丈夫子，癸卯嘉平月，又舉一丈夫子，仁者有後，天道未

始不可問也。至是而公之喜慰可知，已方將拭目二子比肩逐隊，繞膝迎懽。他日聯翩接武，公之桑榆暮景當何如其愉快哉！不意乙巳春三月，一病委頓，遂於十三日赴修文召也。以善人如公而遽奪之，算然則天道其終不可問耶？公易簀前一日，猶神明湛然，條理井井，呼二子至榻前，執手而言曰：「讀書做人，毋負家聲也。」又囑仲季兩弟曰：「善撫此二孤，勿爲他人笑也。」言訖遂瞑。內典所云正念分明，捨報安詳者，公庶幾近之歟。大約公之夙根深厚，非流俗恒情區區



兒女子態所可彷彿也。先於甲辰冬。集親黨昆季。處分家事。周贍族戚。寧厚勿薄。寧詳毋遺。條分縷析。親筆鈐記。燦若列眉指掌。公所以爲兩孤計者。益至深遠。而曲當矣。非平日有學問。明道理。審義命。度越儔輩。數倍者。能如是耶。公一生爲人。恬靜冲夷。常退然若不足。一切世味。毫不以滯其胸。與人交了無嵯岬。而涇渭不撓。接之者。益如春風。又肅如秋氣。祇覺其可親而不可暱也。至其御下。寬仁從無怒容。暴色良由天資長厚使然。公飲不能數合。而樂與客盤桓。終

席靡倦。口不談俗務。而遇事剖分。劃然莫能易。嗚呼。公真不可及也。自遊庠。以迄宦成。歷盡荼苦。鳴琴兩地。則惠愛有聲。奉命欽恤。則不愧治獄于公。一麾出守。則克稱良二千石。洊歷臬憲之間。則無忝外臺之振綱飭紀。公真不負學。不負官。爲不可及也。惜乎天旣報之以功名。而弗與大竟其用。又終報之以胤嗣。而仍靳其長年。弗獲日擊兩孤之成立。哀哉。吾終不能無致疑於彼蒼也。宜乎公嘗自歎曰。他人歷境。苦盡則甘。而余則終身於苦中也。雖然。公兩孤雖藐。已



漸露頭角。又有仲季兩賢。昆感公手足之愛。始終勿替。必能竭力保孤。以捍外侮。勦內政。提攜有成。翹足可埃。是苦則公嘗之。已盡。而甘則悉貽之。後人也。亦可以無憾也。已。公生於萬曆辛丑正月二十三日。卒於康熙四年乙巳三月十三日。享年六十有五。崇禎庚午舉人。甲戌進士。累官中憲大夫。福建按察司使。元配孫恭人。生於萬曆甲辰四月初四日。卒於順治三年丙戌九月初九日。享年四十三歲。繼配章孺人。生於天啓乙丑八月初三日。卒於康熙三年甲辰十

月初四日。享年四十歲。生男二。一長玉曉。章孺人出。聘余曾孫女。次金城。側室卜氏出。聘觀察使若華盛公曾孫女。生女二。一長女孫恭人出。配冢宰諡莊簡五臺陸公曾孫涓。次女章孺人出。許配禮部鼎陶吳公孫讓。木其詳列行狀中。不具書。擇今康熙四年十一月初八日庚寅。葬秀水縣盧家佃上字圩之新阡。以元配孫恭人繼配章孺人祔焉。其孤玉曉。金城。齋行狀來。以誌銘屬余。余與公爲中表弟兄。稔公之生平。本末與夫居官梗概。洵足以則今。垂後。何可使之湮滅。



不彰而忍以不文辭也。爲之銘曰。

賦性兮溫良。制行兮孔臧。螢窓攻苦兮。擅名文章。宦途敷歷兮。震譽官方。東山高臥兮。謙尊而光。周恤宗黨兮。惠溥情長。聽臨訣之遺言兮。令人撫膺而悲傷。信天道之福善兮。應知積厚而流光。壽不滿古稀兮。已播令聞於無疆。縱金石可銷兮。吾直謂公也不亡。

前光祿大夫太子太保戶部尚書靜涵張公墓

誌銘

康熙八年歲次己酉冬。進士張君光第。泣持其先人宮保大司農靜涵公行狀。來屬余誌其墓。併爲之銘。蓋以余與公同登己未南宮榜。有通籍之雅。且相得甚善。以是屬余。嗟乎。余浮沉宦海。幾四十餘年。

今皇上御極。得蒙

恩。予告始歸。老林泉。優游田里。屈指同年友。見在家居。壽考者。落落晨星。若公當日品行甚高潔。居官多經



術且余庚午以後。歷宦豫楚間。嘗與公後先同地同官。知公最深。每慙步趨弗及。今讀其行狀。不禁潛狀泣下。雖衰憊不文。其敢爲公辭。謹按狀。公諱有譽。姓張氏。號靜涵。其先世居無錫之景雲鄉。曾祖諱輔。號玉溪。始占籍江陰之青暘里。大父諱汝翼。號澄源。邑廩生。崇祀鄉賢。父諱履正。號岵望。前壬辰進士。任廣信府知府。崇祀名宦。以公貴。三世皆得贈官。保尚書。累葉或隱或顯。代有碩德。令聞炳耀于時。公生而岐嶷。不好嬉戲。童年卽嶄狀露頭角。曰。吾先世以孝友。

仁義起家。毋或墮紈袴習。蓋早以名世。大儒爲已。任已年十二。隨父任南中。時祠部葛岷瞻先生。官舍相鄰。往受業焉。先生以大器目公。年十七。婚甫逾月。卽之南中就學。十八縣試童子第一。是年遊郡庠。乙卯舉鄉薦。已未捷南宮。出闈。脾疾作。且怛怛心動。不俟捷卽出都門。而父訃適至。號泣馳歸。抵家病益甚。力疾居喪。不出戶者三載。壬戌得殿試二甲。應授北部。公念母老。不欲離左右。力求改南。舊例北部改南。應得禮部。時無缺。選君遲焉。公遽就南。戶部主政。以遂。



其迎養之志。居久之。北新關缺。大司農具疏薦。公力辭。乃就浦口倉差。公蒞倉事。革冗役。裁雜費。而倉耗減其十之三。其收米必平斛。給軍必滿斛。用是屯種積欠。爭先輸納。倉糧遂足。大司農嘉公清廉任職。必欲委以關事。浦差未回。卽題權邢關。公復辭不獲。公之主權也。專以恤商爲主。時小關久閉。用防漏越。居民生理往來。殊苦不便。公至卽開之。以便小民。而於商稅仍無漏越之虞。較准櫃等。驗定船尺。正額完足。五尺以下小舟。卽時開放。行旅如流。歌呼載道。當是

時。璫禍正熾。凡官地方者。凜凜懼不克當。奔趨恐後。揚州建魏祠。郡邑咸集。獨關使者不至。久之。醴臺遣吏來趨。公公毅狀。以疾辭。卒不至。此公居南曹時。首摧逆燄之一大節也。權關纔七月。陞饒州守。公之治饒也。力省詞訟。奸黠之計罔施。禁絕餽遺。苞苴之路不行。月兩課諸生。與司李分較甲乙。鼓勵秀良。捐俸修郡邑學宮。併建尊經閣。置長桌於內。以供月課。一時文士蒸蒸向風。其留心教化如此。公尤尚德。緩刑。凡朔望必稽監簿。自徒刑以下。悉從保釋。每季必親



至獄中。省視疾苦。免其饑寒暑濕之患。恩不靳于罪囚。此公之治饒。卓然號良二千石之大畧也。是時方嚴叅罰。郡邑有司降級俸有差。饒屬餘干樂平。積逋最多。公列叅第二。時謝夫人卒于署。公以悼亡之餘。思欲掛冠。會江省糧道缺。撫軍具題。帶降二級。陞督糧道副使。公去饒。饒民德之。因祠焉。公之在饒也。具悉官旗兌運蠹弊。因盡心釐剔。江右一省糧倉。皆布列會城章江之濱。糧官運省交兌。公爲親驗米色。額限贈耗。搭配停勻。更設立長單。欸列需索陋弊。犯者

令官旗填註繳驗。諸軍貼然。且無米色參差。贈耗偏枯之異。軍民便甚。往時江省漕欠極多。至是各縣俱有餘米。余辛巳官江右。亦承乏糧道。時已逼除。倉卒受事。悉倣公成法。而斟酌行之。幸是年竣運。亦最早。先是建昌屬邑船戶舟覆。失米百石。久繫無補。公將餘米補完。放釋船戶。糧艘抵淮。因駱馬湖溜急。船不得渡。公令每船帶泥十擔。不數日而隄成。遂通繹。挽又議每船派夫二名。過溜如駛。河水多泥。飲者病腹。公爲捐俸施茶。人人德之。丙子秋天。天津告警。漕艘倉



皇運卒多逃逸。各省督漕不至。公加工價。并派船出。夫二名。退入海口。防護巡守。身乘飛棹。往來慰諭。衣不解帶者兩月。漕以得全。是年江運獨先。諸省丁丑。舉卓異。陞七省漕道。公往湖廣督兌。聞水淺。則令運船入閘。卽下板。水盈始放。晝夜督催。不停分刻。省起剝無算。十三把總運竣。謝薦及各州縣長夫。例有餽贈。公一槩禁却。漕臺楊君問曰。院例皆收。公何獨却也。公曰。院差僅一年。謝薦可收。道運完仍留任。若受餽。彼將無所憚。轉索官旗。不可禁戢矣。楊君歎異。久

之。公廉得松郡。上海兌弊。按部水次。爲飭漕規。平耗贈衛弁各相戒。無扞公法。倉棍衙蠹。亦鼠竄潛踪。旬日告竣。省民間米數萬。松人建祠尸祝。此公督漕時聲望蔚然之大畧也。戊寅。丁母艱。公時爲職守所羈。未得親視含殮。嘗以此抱終天之痛。因茹素三年。時荆溪相再召。注意公。欲邀一卮。將引之大用。公以憂謝。竟不赴。服闋。補順廣道。赴任。會值大荒。後土賊充斥。公親巡各縣。嚴保甲。核虛兵。務厲軍實。爲有備無患之至計。壬午。遷蜀臬。公槩却長夫如前。癸未春。始



抵任時冢宰鄭公三俊疏薦公堪任撫軍初推登撫再推秦撫皆不得旨時大計舉天下大廉能五人公實居首奉有先予褒旌仍紀錄優擢之旨真異數也公在蜀兼總藩臬篆文移匆匆公案無留牘有欵案擬贓千計力為申豁藩司解銀裁革平耗立刻收兌屬邑暨小民無不稱便臬司詞過半年槩准註銷郡縣贖鍰率多蠲免此公任蜀臬時左畫方右畫圓游刃肆應之大略也癸未陞應天府丞士民皆號泣攀轅久之得代歸時藩吏以存庫金五萬請充清橐公

麾不納會倉場員缺數推不稱旨最後屬公乃得旨以南京戶部侍郎兼右僉都總督倉場上屬意公嘗于御屏指公名曰張某是一清官且語忻城伯趙公趙以實奏上為拊髀至是始膺特簡云公歸自蜀驚聞流逆之變受事南中歷少宰大農晉宮保追贈三代如其官乙酉五月入武康山不問家事往來深巖絕壑中凡二十五年不飲酒食肉不入城市不謁官府會奉部徵不赴臺薦亦力辭以免康熙元年公子光第以明經貢于京師越明年癸卯舉順天鄉薦六



年丁未第春官。其存心忠孝。制行高卓。甚類公公之積學篤行。亮節鴻材。受知主上。而每遇阻尼。時論傷之。蓋天以公之大業。發于其子也。流芳衍澤。霞蔚雲興。正未可量已。公居官無宦橐。家居不免窘困。而處之恬如。嘗晏坐一室。手不釋卷。著作之富。盈箱溢篋。諸凡地方利弊。必委曲條上當事。鄉邑蒙利賴焉。壬寅大潦。公首倡同里施粥。全活甚衆。甲午集子姓于宗祠講學。闡析微義。遠近赴者嘗四五百人。每月課藝而差等之。凡以文字來質者。評論夜分無倦色。故

公。里。文。風。士。氣。甲。于。一。邑。公。之。教。也。嘗。述。父。廣。信。公。之。言。曰。居。官。以。清。廉。爲。本。清。廉。則。無。才。而。事。自。理。不。威。而。人。自。服。此。吾。生。平。佩。爲。韋。絃。子。孫。當。世。守。者。也。述。叔。父。約。所。公。之。言。曰。居。身。以。誠。實。爲。本。一。句。虛。言。被。人。看。破。則。一。生。言。語。無。人。聽。信。此。吾。生。平。刻。自。檢。點。子。孫。當。敬。佩。者。也。又。曰。事。先。以。孝。敬。爲。主。未。有。不。敬。祖。宗。而。致。子。孫。昌。盛。者。待。族。以。和。厚。爲。主。未。有。不。能。和。好。宗。族。而。能。蒙。祖。蔭。者。此。吾。三。代。以。來。家。法。吾。常。以。之。自。勉。服。之。無。斃。子。孫。當。永。永。遵。守。者。也。又。嘗



戒其子曰。反身務要。知足須作退一步想。處世不越情理二字。世故不通達。只爲執理太過。不能體貼人情。若以情通理。便事事無礙。讀書之法。須一一銷歸自己。方受用得著。否則紙上陳言耳。其處身勵後。有若此公性至孝。幼好奕。稱國手。嘗爲父解圍。以爲笑樂。自父歿。終身不觀枰局。謝夫人孝事姑。甚得母歡心。夫人卒于饒署。不及永訣。公傷悼倍至。後走黔蜀間。以夫人坐椅自隨。其外家墳塋。與祖壟址近。祭則必先往奠焉。昆季三人。公居仲。恭愛兄弟。子姓長幼。

視同一體。或子姓中間有過舉。溫顏諭導。無凌厲之色。鄉黨有事。曲爲調解。非意相加。未嘗與較。御僮僕雖嚴。不加箠楚。訓告不啻如子弟。其敦本善俗。有如此。居恒尊事孝經。曰。民行之本。聖教之宗。且行在孝經。孔子所自道。因手箋義衍補一書行世。初里中有常惺師。姓馮氏。以廣州別駕薙髮立放生池于故居。以公年伯沈周兩公書致廣信公。求爲護生。書至而廣信公歿。公得書慟哭。焚之柩前。自此公終身護生。嚴捕捉之禁。月買生放。益成先志。非獨修善因也。每



樂與諸禪德談出世事。沉酣內典。大有領悟。及持身處世。謂必當以孔子爲師。如方員之有規矩。故入山不異緇流。而居家一循儒禮。素奉先賢遺訓。在饒刻胡敬公居業錄。在蜀刻來瞿塘易說。廣爲流傳。督漕山左。徘徊仲夫子祠。訪其子弟。拔其尤二人送學使。俾青其衿。公之崇正道。恤賢裔。有如此。嘗于河次見絳夫貌類書生者。病幾殆。詢之。河南王氏子。爲後母所逐。試一藝。頗佳。遂厚予衣食。諭以閔子之孝。爲改名學騫。送原籍。至則其父母方與其妻家訟。乃完聚。

同好。卒爲中州名士。以孝聞。公在饒所取士。纍纍科第。門墻桃李實繁。此尤公愛惜人才。嘉與後學之素心也。歲己酉。邑行鄉約。公率子姪往涖厥事。諸人講畢。公登席發明六言之義。懇切真摯。聞者無不感動。流涕。病中書問。必親屬稿。皆勤勤立身修行之事。或以節勞爲言。曰。生苟不以利濟爲念。徒求安飽。雖生猶死也。年逾八十。數過時。可聽之而已。卒之前。猶諄諄遺訓子孫。云。年已八旬。時至卽行。爲子孫者。當以誠實存心。以敬謹持身。以孝友事親。以勤儉治家。以



謙厚居鄉。以清慎守官。以忠貞報國。以讀書爲世業。以聖賢爲師範。此則克家之子。繩武之孫矣。嗚呼。讀公遺訓。數語真古聖賢範。世之準則。移風易俗之格。言渺論匪直公一家之著鏡已也。平時心折靈巖和尚。造至永訣。遂不復語。夜半命解衣曰。吾一絲不掛。盡去諸縛。歿時惟呼母再三。遂瞑。所謂正念分明。如入禪定者。非歟。余于是按公一生事親孝。事上忠。兄弟友。夫婦睦。接下溫溫。自始至終。操持凜然。大節細行。未之或墮。以之入世而全體大用。無不該。以之出

世而真參實悟。確有據洵所謂真能入世者。方能出世。而曾不以富貴功名滓靈性之本來。真能出世者。方能入世。而又不以虛無寂滅掩大儒之功用。人生至此。可謂體受歸全。而無毫髮遺憾焉者已。爲之銘曰。

維公之德。以孝爲先。周于六行人倫罔愆。高潔性成。筮仕尤堅。署必就冷。差必辭羶。璫燄方熾。排衆挺朕。權關治郡。尚民二天。釐剔漕弊。董運獨前。駁歷監司。肆應皆圓。峻却庫遺。四知是虔。權要來親。遠若免焉。



清官之名宸鑒高懸。迨陟卿貳國事已顛。蕭狀窮居。二十五年講學尊經。明道倦倦。賑荒講約。為善綿連。戒勉子姪。務軌聖賢。遺訓諄諄。可法可傳。研窮理學。程朱比肩。芻及竺典。了悟入廬。用世出世。均陟其巔。坦視生死。允稱歸全。子子孫孫。音徽永宣。爾昌爾熾。百禩勿遷。

贈通奉大夫內翰林弘文院學士岐山朱公暨

配封夫人沈氏合葬墓誌銘

朱公岐山諱三鳳。上世深州靜安人。宋時有諱珍華者。始居義烏之梅隴。五傳而生肇。博物洽聞。饒有幹濟才。受知明成祖。以戶科給事中出鎮江右。樹駿流鴻政績。赫然所著有撫安事錄等書。藏于家。又五傳而生秀。秀生天勤。是為公考。累世皆有隱德。負長者名。公生而敏穎。志履卓犖。不群。問業受經。塾師以大用期之。繼念厥考。力作經營。仰事俯育。終歲捐捐。莫



與分臂指勞。遂廢書而歎曰。吾不忍老者勤。而少者  
逸也。因躬被襪。鋤雨犁風。必身先之。已而食指漸  
繁。養殮弗繼。遵父命遊燕邸。居積什一。畢慮殫心。不  
顧瑣屑勞瘁。然賦性端方。言矢金石。行質鬼神。有一  
介不苟之操。當世賢豪。多樂與遊。即王公貴人。見輒  
賓禮。不數年。生計漸饒。足資里門菽水。始釋厥考。仰  
事俯育之累。公乃稍稍得安枕矣。尤仗義矜然。諾有  
貧窶困若。婚喪不克舉者。必為之悉意區畫。毋令失  
所。後已。縱倉卒告急。鮮弗立應。以是橐中裝。數盈數

落。終不獲以素封名也。今總河大司馬梅麓初生。公  
識其有異。必能大亢我宗。甫脫乳。即趨就外傳。延禮  
四方名師碩友。朝夕切劘。罄所有為修脯資。絕弗靳。  
嘗一隸銓曹。從事冀博半通之秩。了一生耕讀債。已  
復思窮達前定。與其蛇行蒲伏。仰人鼻息。曷若專力  
課子。光昭詩書。先澤之為大哉。竟棄不就。比聞考訃。  
徒跣奔歸。竭盡哀戚。自公還里。居喪後。生業盡廢。平  
時嘗受德者。往往見背。或甚而反加侮焉。在旁觀者。  
目擊生死交情。炎涼反覆。不勝悵念。公怡然處之。毫



不介意。且庭訓司馬君曰：汝不聞朝趨市者，側肩爭門而入，日暮之後，掉臂不顧。此世態之常，今古同然。無足尤也。每爲陳祖宗承家積累之艱，與夫前人往事，賢否得失之蹟，某也當戒，某也當儆。疊疊不倦，倘燕閒侍坐，或微有跛踣懈色，亦譴責不稍貸。其義方之端嚴細密，類若此會。

清朝鼎興，司馬捷南宮，讀中秘書。公貽之書曰：吾家世耕讀。今汝幸席先蔭，掇科第如拾芥，又與石渠天祿之英，肩隨染翰共沐。

恩寵造物之予我者，奢矣。奢則須持之以約，慎勿驕侈。

肆志滋我老人憂，其謹識之。毋忘司馬君之位大而心小，名高而實副。皆公之燕翼貽謀，有以致之也。公故好飲，日與親朋故舊，曳杖銜杯，盡歡乃罷。宜公之怡愉壽考，正未有艾也。而公素精星家言，嘗自謂吾年五十七數當止。此適庚寅歲，司馬君力請歸省，幸聖天子方以孝治天下，朝上夕報可。甫旋里，未數旬，公竟寢疾逝矣。嗚呼！公孝友天植，妣氏春秋高，公年且逾艾，定省承歡，無異孺慕。昆季二人，折箸且久，然



豐約與共。未嘗有爾我之岐。一從姪病痘危甚。公携置已舍。百方救療。卒保無恙。宗黨姻戚。有讀書能文章。而力不逮者。必獎詡而扶植之。以底于成。郡二千石。聞其風。高其行。誼式廬造。請禮之賓筵。用示矜式焉。公元配沈氏。產自名族。父諱天和。母孟氏。年甫及笄。卽于歸。翁姑俱嚴重。夫人事之甚謹。問衣佐饌。罔有弗虔。方是時。諸叔幼未婚。旁無姊姒之助。井臼烹飪。蠶績紉綴。悉出夫人十指中。女史中所艷稱婦德。艱辛勞勩。未有如夫人之甚者也。訓督司馬君。頗峻。

篝燈課誦。恒至丙夜不休。卽嚴重難事之翁若姑。亦嘖嘖歎其賢。而相與語曰。冢婦宜家。吾門當有興者。其在是乎。贈公之始。而力田穡作。繼而懋遷。有無化居。終而以通經學古澤民。致君教其子。皆夫人晝夜操作爲之。左右以襄厥成也。夫人性敦朴。卽司馬君已致通顯。而猶飯脫粟衣。敝衣。貴不忘貧如此。當贈公捐館之日。夫人號痛欲絕。斷葷茹齋虔。奉竺典。晨夕不輟。以資贈公冥福。司馬君間以甘脆紈綺進。却不肯御。由是過哀成疾。氣血內耗者甚矣。嗣後就養。



宦邸每一念及丘墓輒爲潛然泣數行下未幾疾作遂告終于河署所最堪撫膺太息者屬纊之際猶倦倦念老姑不置也贈公生于萬曆甲午六月初四日卒于順治庚寅十月二十七日夫人生于萬曆壬寅六月二十八日卒于順治戊戌二月初八日俱享年五十有七先是司馬君爲史官時以

吉禮告成覃恩岐山公贈通奉大夫內翰林弘文院學士加一級元配沈氏封夫人夫人之卒也司馬君循制泣請扶櫬終喪

上念河務重大漕運攸關非司馬君弗克任一疏再疏弗允所請

特詔奪情視事己亥冬始申請報可且

俞禮官所援掌故賜祭葬如制今將卜于本年七月某日合葬贈公暨夫人于某山之原而以其狀來屬余銘余何能文以傳贈公與夫人哉雖然余文雖不足傳而世人艷稱公與夫人之行頗多多必則倣之則倣之必相與謹視之是公與夫人之足以傳後也卽余文之獲附以傳也其何敢辭謹按狀公生丈夫子



一卽總河大司馬梅麓君娶沈氏孫男一尚幼孫女一許聘襲封衍聖公冢嗣毓沆爲之銘曰

天道可知耶豐于德嗇于壽天道不可知耶積于躬昌于後同坎而瘞同簋而禮綿綿瓜瓞永賁

恩綸石可泐兮名則彌布歲或遷兮藏之益固

誥封中憲大夫浙江按察司副使幼儀秦公暨

配華恭人合葬墓誌銘

康熙七年歲在戊申夏五月錫山秦封翁幼儀公卒我吳門之士大夫奔走震悼以爲當今之老成學博而行高爲鄉里遠近所則倣莫我秦公若相與會於喪所語公行事靡不歎且泣者余亦爲文以弔之僅及公之大略及親故之情而已未能詳懿美之萬一也秋七月公之子觀察君鉞列公行事及奉公存日所撰華恭人紀畧并公之姪孫對巖太史合狀率仲



季兩文學。稽顙乞銘於余。余與觀察君有一日之知。雖老不能文。敢辭公銘乎。謹按狀公諱重采。字幼儀。姓秦氏。系出宋龍圖閣直學士少游公諱觀之後。龍圖公子湛。倅常州。遂家於武進之新塘鄉。而遷葬龍錫。秦氏支盛於錫山。自瑞五公始也。又六傳至兵部尚書贈少保諡端敏鳳山公諱金。為公高祖。端敏公生二子。次曰次山公諱汴。知雲南姚安府。次山公生三子。次曰定橋公諱楷。邑文學。定橋公生四子。其季

念橋公。諱延默。知金華湯溪縣。有政績。祀名宦。公之考也。配吳孺人。生二子。公其次也。公生而穎異。語言行止。屹如老成人。蓋自瑞五公以來。凡十一世。代為冠族。公之幼學。敏給。威儀爛具。人不以此異。公獨其孝友性成。真懃篤摯。見者以為非凡兒比。年甫十四。會湯溪公以覲歸。遂捐館舍。居喪次。哀毀骨立。禮節詳委。雖善居喪者。有未迨也。又五年。而有母喪。方吳孺人素強。飯卒中風。公籲天求代。祈所以延年却疾者。無不盡。比歿。引痛逾年。不御鹽酪。忘生趣者久之。



方母殞在堂時不戒於火前堂既燼火延入柩所公憑棺號呼火及簷而返人共異之以爲純孝所感也至哀慕之思纏綿不輟雖細事凡有覩物興懷感及前人者輒嗚咽終日若春秋省墓或慶事告家廟中歛歔泣下拜不能起吳孺人嘗遺紵綺在笥卽無衣不忍服間一開視則淚泫泫然此公之孝於二親終其身如一日者有如此伯兄先之長公十有六年敬事如父一切家政無鉅細必請而後行晨夕候安否伺顏色雖終日怡怡而恭謹謙下曾不敢以鴈行齒

先是邑中糧長之役最爲繁重邑人苦之公與兄共戶而兄田較多費亦當贏公引而均之曾不以多寡生較量鼎革初邑令籍邑之富戶派餉人三百金而兄與焉公曰門戶事何可獨累吾兄卒均任之兄嘗有訟事連歲糾纏每出公必隨費則爲之助求援則代其奔走甚至小舫夜行雖戒心勿顧也兄嫂疾病醫禱需費大半出公橐後兄嘗病噎症苦難療公侍疾於蘇謹視湯藥晨夕不離未嘗以家事遑歸凡數月而兄疾愈歲乙酉嫂病中虛時聞兵信城市騷然



將挈家避地。公毅然曰。嫂病非參勿療。吾可他往乎。冒險抵閭市。參嫂病以瘥。遺丁兄之喪。哀慟幾絕。閱數年。猶與親朋言及。輒痛失聲。不能自禁。此其篤於昆弟。見於急難。疾病死亡。以至閒居。悼往淋漓。感愴者。有如此。元配華恭人。齊眉相莊。十有八年。間無嘻容。無忤色。恭人歿時。公年纔三十有五。不復再娶。因有詩云。好取蒲團消白晝。莫將羅帳悞紅顏。蓋公自誓意也。於是視恭人家逾厚。奉外母施孺人。迎養間遺。不以久而稍怠。嫁內兄之孤女。如同已女。無二子。

寒暑調護尤謹。曰。吾以父而兼母也。因自傷詩云。一朝中饋殞。百事煩支吾。未束行者裝。先謀居者舖。此公於夫婦之義。存歿罔間。終身不渝者。有如此。至於撫愛諸姪如已子。其有過。責讓亦如之。姪有僕。爲人誣盜。漸侵其主。因構而求利焉。公力疾白郡守。事乃得雪。有妹適湯氏者。家貧苦節。以兄先之賞厚。求助不得。間出怨言。公多方慰解。私自往遺。不終傷兄妹間意。而伯氏竟未之知也。有從姊負公金不償。內自慙。不往來者二十年。公矍然曰。些須阿堵。奈何。以此。



遠。骨。肉。乎。吾。久。已。忘。懷。矣。後。仲。甥。以。檇。蒲。負。人。金。有。欲。奪。其。季。之。產。以。償。公。又。力。疾。告。當。事。卒。以。產。歸。季。姊。因。泣。謝。歡。好。如。初。至。於。恭。事。諸。從。兄。弟。不。異。同。胞。絕。無。間。言。其。羣。從。子。姪。亦。如。同。體。嘗。書。示。觀。察。君。云。做。官。之。日。少。爲。兄。弟。之。日。長。此。其。厚。族。之。本。懷。也。則。又。因。一。本。之。愛。所。推。而。始。終。靡。間。親。疎。不。遺。者。有。如。此。昔。崑。山。張。烈。愍。公。松。江。張。瀛。海。先。生。皆。公。父。執。烈。愍。之。官。時。有。所。稱。貸。及。殉。難。公。爲。焚。券。瀛。海。先。生。有。子。督。學。浙。中。爲。言。者。註。誤。事。下。浙。撫。時。觀。察。備。兵。於。

杭。公。遺。書。喻。意。以。雖。非。所。職。有。可。爲。地。必。左。右。之。嘗。言。秀。水。馮。公。夢。禎。中。州。季。公。道。統。閩。中。林。公。某。皆。吾。先。人。考。試。歷。官。時。所。受。其。隆。遇。者。吾。子。孫。切。勿。遺。忘。倘。宦。途。相。值。其。必。思。所。以。報。之。同。邑。貞。菴。徐。公。令。金。華。力。言。湯。溪。公。之。德。政。得。崇。祀。名。宦。後。兩。家。佃。僕。相。爭。公。曰。若。徐。公。者。卽。有。加。於。我。猶。將。讓。之。竟。置。勿。問。他。若。周。急。受。業。師。厚。禮。通。家。兄。弟。歿。身。已。久。猶。追。念。感。泣。如。初。此。公。之。於。生。平。故。舊。久。而。不。忘。人。不。及。知。而。切。切。縈。懷。曾。不。以。物。換。時。移。稍。渝。其。木。本。水。源。之。



思者有如此嘉定欠糧一案幾波累公家或爲謀者當首詭寄乃得免公曰禍福命也吾忍嫁禍於人哉卒竟豁然公嘗遊虎丘奴拾一釵亟命覓主還之行數武有兩婦以失釵相怨詈因舉而授之婦感謝問公姓不答而去曾買一小婢越日來贖其父曰鬻女以通糧故今典吏陳君陽憐而代償知公厚德必聽贖也公驚曰胥吏中有若人哉吾不如也亟以女還之曾於吳閶買參誤多數兩計值二十金公如數還之有黃姓者贖田於公其人誤以畝價二兩旣而出

原契乃二兩有奇卽歸其餘直此公之立心忠厚制行光明遇一切事以含弘廣大爲主而又絲毫不苟能揭肝腸以示人者有如此公讀書勤學冠冕膠序卒不得志於有司遂棄舉子業課其三子惟寄情詩史獨居暢咏歲乙未予奉

命擢士禮闈得長君卷器局凝重合會稽宣城一派遂以第一人舉蓋其所學洵自有原本也及對策

大廷諸臣循故事讀卷畢蒙

世祖章皇帝御便殿親覽位置及第三人極其賞歎比拆



卷觀察君與焉

上喜不禁已列侍從類承

召對賜衣命宴寵渥皆出殊數此蓋公積德耀後之明驗歟觀察君既歷宦途公遺書屢戒以精白一心報國爲先又勉以勤讀中秘書備他日

顧問會

天子銳意求治內外互轉以期學有實用觀察君遂分叅浙藩大著廉惠聲蓋得之庭訓爲多也公一日至署語觀察君曰客有言汝慈祥太過者宜稍示威嚴

觀察起而謝曰兒誠不忍敲人肌髓充客遊橐也公爲首肯者再及觀察莅江右公復之署中聞豫章之誦聲猶浙公大喜曰兒固不欺若言矣昔爾祖令湯溪以前令逋帑金主吏繫獄者纍纍而祖蠲俸補之全活甚衆汝能平反無罪而祖其不亡乎後觀察君以失出掛議公遺書曰汝意在活人以此遷謫吾何憾哉有武弁爲人所訐臺檄觀察訊之其人懷金候公於途公曰若理直無用求我若曲則可令吾子在法耶此公之以忠良勉其子務期報國稱職法祖光



前者有如此。公雖以子貴。然儉約性成。衣必數澣。食無三豆。嘗徒步。鄽市間。與往來。負擔之夫。笑語相答。有若平交。及見人有過。輒面折。不顧忌諱。既而渙然冰釋。人不之怨。見人之善。不啻已有。與人交。初終如一。郡邑咸切式廬。欲一望見顏色。不可得。至遇公事。恒抵掌發憤。為之剖晰利害。剴斷可否。絕無詭隨。士大夫交重之。公初以勤儉治生。家稍裕。後歲歉。賦急。兼有糧長之役。家竟落。癸未元日。有詩云。絕年逢五。癸涉世得千辛。蓋自悼也。又念恭人未葬。怏怏不樂。

題云。鳩拙尚成巢。以我方鳩鳩。不拙鶴歸猶識表。他年化鶴鶴何歸。卽公之閒吟寄懷。其生平大略可睹。已少時豪於酒。客至留連旦夕。尤喜讀書。晚年手不釋卷。每芳辰令序。時花競發。必邀集賓朋。籃輿往會。興盡而返。凡蘇杭佳山水處。歲必一遊。性曠達。不以死生為諱。先一歲。豫營生壙。遨遊置酒。泰然自得。今年夏五日。汎舟蓉湖。猶觀競渡。忽次日疾作。戒勿祈禱。及醫藥。臨革。正衣冠而逝。無一語及家事。竺典所云。正念分明。捨報安祥。其公之謂歟。嗚呼。按公之一



全文通公集 卷十三 墓誌銘  
生大槩植根於至孝。少孤而戚易能兼。端本於訓。子服官而戒勉。倍至篤愛於昆弟。吉凶憂喜之必均。施恩於戚。媯榮枯隙好之勿間。以至與人不立崖岸。律身一軌。準繩怡情於山巔水涯。達觀於死生夢幻。一心不亂。無疾端逝。公真全始全終者已。雖篤學嗜古。惜不能行其所志。然觀長君之理學政事。醇而不疵。瞻而有體。受知於

聖主興文之世。流鴻於知人善任之

朝。公之學不可謂不達。公之志不可謂不伸。後日傳之。

遺老垂之史冊。允作人倫之儀型。公雖歿而猶存也。夫恭人姓華氏。家世邑之鶯湖。南齊孝子寶之裔也。父諱自立。號景和。篤志好學。數奇不售。晚年寄情詩酒。多植花竹。自娛暇則親課其子女。恭人生而慧敏。與兄同受訓迪。通經書。善制舉業。工五七言詩。母施氏族本相城。勤儉宜家。誨女有方。故恭人夙嫻針繡。烹飪諸內事。景和與湯溪公有執經問業之雅。相知深故。以女字幼儀。公恭人之始至也。侍姑吳孺人側。見婦端謹。心喜之。已而談言億中。試事事理。尤喜之。



曰吾得佳婦矣。凡十六月而姑見背。恭人時值產蓐。哀毀執勞。不遑自顧。值冬有火災。火逼樞所。震驚悲悼。因而精神耗損。恭人事姑之日。雖短。其所以致孝於姑者。情甚長已。恭人少於長姒者十五年。不以比肩自居。敬之如其姑。凡事必相諮度。至於艱鉅難爲者。又不以少而自諉也。長姒有母。奉之猶已。母視其姊。姊猶已。姊姊問遺時通。吉凶同患。幾忘膈膜。此其姊姒之無間然者也。封公少時。困於小試。恭人勸公遊學。入郡受業於舅氏吳霞翁。寓居蕭寺。爲繼粟饋。

食。絀縫浣濯。不俟需時。嘗手書慰勉。絕不及家累一字。嗣後寓居肄學。以及試事。無不皆然。至於爲子就業。勵公同遊。其資助餽遺。亦復皆然。此恭人相夫助子力學之大節也。幼儀公喜賓客。與親故尤相敬厚。恭人致其豐腆。無缺供。又恒蓄嘉旨。以俟公不時之需。至於歲時享祀。竭其誠敬。躬視烹飪。自奉則腐羹菜菹而已。後食指漸繁。外供師塾。與戚屬往來。心計轉劇。然能計其奇贏。終不使歲之所出。浮於所入。俾足以繼。而又持大體。非一意纖嗇。此尤中饋之饒具。



經理者也。恭人性至孝。方其嫁也。父喪未竟。恭人退就私室。卽易縞以居。淚汪汪注頰。以是爲常。及姑之喪。常失聲號。以事姑未久。爲恨。故於送姑喪也。抱病而起。力疾奔馳。哀號於寒風凍雪之中。毀不自知。及送父之喪。則疾且更甚。扶掖臨窆。或以病止之者。曰。於此而不盡吾情。後悔何及。此恭人之事。其姑若父。殆自始至終。必誠必信。而無毫髮遺憾焉者。也。至於迎養已母。朝夕所需。如其意。於弟兄。極其親愛。或延諸館。或相以室。恭人歿數年。猶令戚屬。媢黨言之。人

人垂涕者。方恭人之病劇也。封公父子。藝學於郡。恐告者。倉皇戒勿言病。以他事迎公。及歸而病革矣。恭人之用心若此。宜乎封公紀略所云。令人悽入肝脾也。其大節輝著。可謂旣孝且順焉矣。嗟乎。孝友如封公。力學篤行。如封公。吾方虞其難爲。比德者而恭人之賢且淑焉。如此惜乎。天靳以年。而不克睹其子之成。竟使封公之鬱鬱以老也。然恭人以婦道完德。而能使封公之伉儷情長。誓鸞膠之勿續。有賢胤之騰驤仕路。佇



金文通公集卷之三 墓誌銘  
綸綍之疊膺。光女史而榮家。乘亦足以不朽也。已爲之

銘曰。

公篤生兮誠且恭。孝其親兮友于兄。憑棺呼兮火反  
風。思追慕兮無終窮。均兄役兮何嗇豐。佐公輸兮憂  
樂通。壯失偶兮婚不重。誓再世兮羅幃空。念故交兮  
情極隆。還釵返價兮德莫崇。躬行君子兮實由衷。迪  
子文行兮何龐鴻。結

主知兮慶遭逢。勵服官兮惟作忠。嘉公德兮榮褒封。樂  
山水兮憐遊踪。名花時笑兮扶短筇。跡絕公庭兮侶

鄉農。緡書史兮詩酒爲功。嗟好述兮濫焉先終。生長  
違兮泉穴同。雙雙令德兮標長松。宜福祿兮後胤隆。  
石可泐兮名不斲。千秋無極兮永奠幽宮。

金文通公集卷之十三終



墓



